

Carta nachindahá Pablo nuú na cúu cuéntá Jesús ndúu ñuu Roma

Cáhan Ndióxi Pablo xihín na cúu cuéntá Jesús

¹ Yehe cúu Pablo ta Jesucristo cúu xitoho i. Nacaxi Ndióxi yehe cacuu u in apóstol cuéntá mé á ta nachindahá a yehe cuhun i cahan i tuhun vaha saha Jesús nuú ñayivi.

² Sanahá ndivaha nacaja Ndióxi ña ná cahyí na profeta mé á tuhun vaha sahá ini libro yii Ndióxi.

³ Mé tuhun vaha yóho cáhan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi nacacu ñuyíví yóho ta naquixi a chichi rey David. ⁴ Ta najánaña ínimá yii Ndióxi ñayivi ña cúu Jesús in túhún jini já jahyi Ndióxi, mé a cúu cája tóco ndihi ñaha. Jáchi tá sa naxihí Jesús já nanditacu tucu a ta xihín ña yóho náha ña cúu á in túhún jini já jahyi Ndióxi. ⁵ Ta sahá ña nacaja Jesucristo ndica crúxu sahá ña yóho nacaja Ndióxi ñamaní xihín ndihí. Já nachindahá Ndióxi mí ña ná cuhun í cuéntá mé á cahan í saha Jesús nu tóco ndihi ñayivi ndúu ñuyíví já ná cuu candeé ini na mé á ta já ná caja na ña cúní a. ⁶ Ta mé ndó, na cúu cuéntá Jesús ndúu ñuu Roma jan, nacaxi Ndióxi ndohó cacuu ndó cuéntá mé á.

⁷ Ña cán quea cahyí i carta yóho nu ndó, na ndúu ñuu Roma jan. Jáchi cúní ndivaha Ndióxi ndohó ta nacaxi a ndohó nduu ndó ñayivi mé á. Ta ná

caja Ndióxi, tátá yó xihin Jesucristo, xitoho í cuahá ñamani xihin ndo ta ná caja ña ná coo vaha ini ndó.

Cúni Pablo cuhun da ñuu Roma coto nihni da na cúu cuéntá Jesús ndúu cán

⁸ Ndi quiahva i ndixahvi nu Ndióxi sahá ña nacaja Jesucristo xihín in in ndó jáchi ñayivi ndúu ndijáá ñuyívi xíni johó na ña cándeé ini ndó Jesús. ⁹ Yehe cája chúun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xíni vaha Ndióxi ña tóco ndihi quivi xíca tahví i nu mé á sahá ndihi ndó. ¹⁰ Ta ndijáá ní quivi xíca tahví i nu Ndióxi ña ná quiahva ñamani nuú i saa i jan coto nihni i ndohó tá cúni a. ¹¹ Jáchi cúni cuni i ndohó já ná caxi tuhun i xihin ndo ndá quiahva cúni ínima yii Ndióxi caja ñamani xihin ndo já ná ndindacú chága ndó cuéntá mé á. ¹² Ña cúni queá ná quiahva tuhun ndeé ini táhan í jáchi in cándeé ini ndihí Ndióxi.

¹³ Cúni ña ná candaá ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo ín cuahá ña sájí nuu nuú i sahá ña cán queá cámani saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel. ¹⁴ Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñuhú. Ta cahan i tuhun Ndióxi xihín na ndíchí jini ta xihín na co ndíchí jini. ¹⁵ Ña cán queá xíca ndivaha ini i saa i nu ndúu ndó ñuu Roma jan cahan i tuhun vaha saha Jesús xihin ndo.

*Jácacu Ndióxi ñayivi sahá tuhun vaha cáhan saha
Jesús*

¹⁶ Co cácahan nuú i sahá tuhun vaha cáhan saha Jesús jáchi cúu á ndée Ndióxi jácacu a tóco ndihi ñayivi, na candeé ini mé á. Ta jihna ñuhú nacasáhá Ndióxi jácacu a ñayivi naquixi chichi Israel ta viti jácacu a tóco ndihi ñayivi tá candeé ini na mé á vatí cúu ná na tóho á cúu ná na Israel. ¹⁷ Jáchi náha tuhun Ndióxi nu yó ndá quiahva nduu ñayivi ndaa nu mé á. Ta cúu á sahá ña candeé ini mé á ta sahá ña yóho cuití va jáchi coó a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á.”

*Tóco ndihi ñayivi ndúu ñuyívi cómi na cuachi nu
Ndióxi*

¹⁸ Janda indivi nu ín Ndióxi xójo ini a xihin tóco ndihi ñayivi cája cuachi ñuyívi yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaa ini ña ndaa saha Ndióxi. ¹⁹ Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xíni na saha mé á joo co cándúsa na ña. ²⁰ Janda sahá ñuyívi xíni ñayivi ña nacavaha Ndióxi ñuyívi xihin indivi xihin tóco ndihi ñaha. Ta xihin ña yóho cuu candaa ini na ña ín Ndióxi ta cuu candaa ini na ña ín ndée mé á caja ña cúni a anda ama cáa quívi. Sahá ña cán quéa a cúu cachi na ña co xíni na á ín Ndióxi á coó a. ²¹ Vatí cándaa vaha ini na ña ín Ndióxi joo co cája cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña cája na quéa cáhvi

núu ini na ta coó saha toho ña cáhvi ini na. Ta cúu ná tátuhun ñayivi tóntó jini, na xica nuu nuú naá yávi. ²² Ta vatí cáhí na cúu ná na ndíhí jini joo cúu ná na tóntó jini. ²³ Najándacoo na ña cája cáhnu na Ndióxi, mé a tácu anda ama cáa quivi ta nacavaha na tiniñu yúu ña ñéhe nahná ña, da xihí yachi. Ta nacavaha na nahná laa xihín nahná quiti xihín nahná coo. Ta nacasáhá cája cáhnu na ña.

²⁴ Sahá ña cán queá najándacoo Ndióxi na ña ná caja na tá nuú ña núu ña cúni na caja na. Anda jávi nacasáhá na cája quini na xihín yiquí cuñu táhan na. ²⁵ Co xeén na candúsa na ña ndaa cáhan saha Ndióxi joo nacandúsa na ña tuhún. Ta nacaja cáhnu na ña nacavaha Ndióxi ta coó nacaja cáhnu na mé Ndióxi, mé a nacavaha tóco ndihi ñaha. Jáchi Ndióxi queá xini ñuhú caja cáhnu í anda ama cáa quivi. Já ná coo.

²⁶ Sahá ña cán queá najándacoo Ndióxi na ña ná caja na ña xica ini na caja na, ña co ndítahan caja na. Ta naxinu na janda nuú najándacoo najihí ña quiji na xihín yí na ta já nacasáhá quiji xihín táhan ndaja jihí mé va na. Ta ña yóho cúu á ña coó nasacu ini Ndióxi caja na. ²⁷ Ta quiahva já nacaja ri dataa. Najándacoo da ña quiji da xihín ñajihí da ta nacasáhá ndicají ini da caja da ña núu xihín táhan mé va da janda quiahva nacasáhá quiji xihín táhan mé dá. Chí nuú cacahan nuu yo queá cája xihín táhan da. Ta tá nandihí já cásáhá ndóho ini yiquí cuñu na sahá ña núu cája na.

²⁸ Naxinu na nuú najándacoo xóo na Ndióxi ta co cúni ga na candaa ini na sahá. Sahá ña cán queá najándacoo xóo Ndióxi na ña ná cahvi núu ini na ta já cája tá cája na ña co ndítahan nu ná caja na.

29 Nandicutú ndaa ínima ná xih̄in tá nuú ña núu, ña cúu cuachi. Ta ndiáva ín̄i na quehe na ñaha cómi inga ñayivi ta cája xíxi na xih̄in ná ta cáh̄ihvi ini na ta sáhn̄i na nd̄i ta cáni táhan na ta jándahvi na ñayivi ta cáhvi núu ini na sahá inga na ta xíca nuu na cáhan túhún na. 30 Ta cánahá quini ndivaha na xih̄in inga na ta cándají na Ndióxi ta yáha yúhu na xih̄in inga na ta cája ich̄i ini na ta cája cáhnu na mé va na. Ndiáva ín̄i na ndaja caja chága na cuachi ta sáa ini na caja na ña cún̄i tátá náná na. 31 Co xín̄i túni na ta co jáxinu coo na tuhun sáhan na nuú ñayivi. Co quíhvi ini na ñani táhan na ta co cája cáhnu ini na saha ná ta co táhnda ini na sahá ñayivi. 32 Xín̄i vaha na ña nasahnda Ndióxi nu ná ta xín̄i na ña ndítahan quivi na sahá cuachi cája na. Vatí cánda ini na ña yóho joo xih̄in ndinuhu ini na cája tá cája na ña núu. Ta janda cáji ini na tá cája java ñayivi mé ña núu.

2

Caja vii Ndióxi saha tóco ndihi cuachi

1 Mé a ndaa cómi ndó cuachi nu Ndióxi. Sándehé ndaa ndó inga ñayivi sahá cuachi cája na joo chícaan ndó cuachi jata mé va ndó jáchi cája ndó mé cuachi cán. 2 Sa xín̄i vaha í ña cája ndaa Ndióxi tá jándoho á ini ñayivi sahá cuachi cája na. 3 Mé ndó sándehé ndaa ndó cuachi cája java ga ñayivi ta cáhán ndo vaha cája Ndióxi tá chíndahá na cuhun na indayá. Joo cáhán ndo ña caja cáhnu ini a saha mé ndó vatí cája ndó mé cuachi cája na cán. 4 Ndája núu ndó Ndióxi, mé a cún̄i caja cuahá ñaman̄i xih̄in ndo jáchi xín̄i ndó ña co jándoho yachi

Ndióxi ini na cája cuachi. Cúni Ndióxi ña ná ndicó coo ini ndó jándacoo ndó cuachi cája ndó. ⁵ Ihvi ndivaha cúu ini ndó jáchi co jándacoo ndó cuachi cája ndó. Nandicuahá cuachi ndó ta jándoho chága Ndióxi ini ndó tá ná tandaa quivi caja vii a sahá cuachi nacaja ñayivi. Mé quivi já ndaca náha ña cojo ini mé á saha cuachi ñayivi ta náha ña ín saha mé á jándoho a ini na cán. ⁶ Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyívi yóho. ⁷ Java ñayivi nacaja na ña vaha xihín ndinuhu ini na ta nacacúni na caja na ña ná cajii ini Ndióxi xihín já ná cachi Ndióxi ña cúu ná ñayivi vaha. Ta nacacúni na coo na nu ín Ndióxi anda ama cáa quivi. Ta mé na cán cúu na cuhun coo xihín Ndióxi anda ama cáa quivi. ⁸ Joo cojo ini Ndióxi tá jándoho a ini na sáa ini, na co cúni cuhun xoo ña ndaa jáchi catóo na cuhun na xoo ña núu. ⁹ Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coó naquixi chichi Israel. ¹⁰ Joo cajii ini Ndióxi xihín na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihín na naquixi chichi Israel já casáhá caja ri a já xihín na coó naquixi chichi Israel.

¹¹ Jáchi coo cúu á tátuhun cúni Ndióxi in ñayivi ta cándají a inga na jáchi in cúu ndihi ví nu Ndióxi.

¹² Vatí co cándaá ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaá ini ñayivi ña sáhdá ley Moisés joo cuhun tá cuhun na indayá sahá cuachi nacaja na. ¹³ Jáchi tá cándaá ini na ña sáhdá ley Moisés

ta cō cāja na ña jáchi cō cáchí Ndióxi ña cúú ná ñayivi ndaa nu mé á. Ta tá cāja na ña sáhndá mé ley Moisés anda jáví cáchí Ndióxi ña cúú ná ñayivi ndaa nu mé á. ¹⁴ Ñayivi, na cōó naquixi chichi Israel cō xini na ña sáhndá ley Moisés. Cāja mé ná ña sáhndá ley Moisés jáchi já xinu ini na caja na ña vatí cō xini na mé ley Moisés. ¹⁵ Ña cāja mé ná náha nuú ñayivi ña nasacu Ndióxi ley mé á ini xini túni ná. Ta xihin xini túni ná cándaá ini na tá cāja na ña vaha á tá cāja na ña núu. Ta quiahva já xihin mé xini túni ná xini vaha na á cāja na cuachi á cāja na ña vaha ¹⁶ tá ná xinu quiví quiahva Ndióxi chuun nu Jesucristo caja vií a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jánaha i nu ndo.

Nā naquixi chichi Israel cándusa na ley Moisés

¹⁷ Ta mé ndó cáchí ndo cúú ndó na naquixi chichi Israel, na cándusa ley Moisés. Ta cáchí ndo cāja chága Ndióxi ñamaní xihin mé ndó a juú ga xihín java ga ñayivi. ¹⁸ Ta cáchí ndo ña sa xini ndó ña cuni Ndióxi caja ndó ta cáchí ndo ña sa xini ndó caxi ndó ña vaha jáchi sa najácuaha ndó ley Moisés. ¹⁹ Ta cáchí ndó tiahva vaha ndó chindeé ndó ñayivi ña ná ndihvi na íchi Ndióxi ta cáchí ndo ña cúú ndo tátuhun in lámpara jándiyéhe nuú ñayivi xica nuu nuú naá. ²⁰ Ta cáchí ndo ña tiahva ndó jánaha ndó nuú ñayivi, na cō xini túni ta cáchí ndo ña tiahva ndó jánaha ndó nuú ñayivi, na cámani cataçu vaha ini. Cómí ndo ley Moisés sahá ña cán queá cáhan ndo xini ndó tóco ndihi ña ndaa xihin tóco ndihi ñaha. ²¹ Mé ndó jánaha ndo ley Moisés nuú ñayivi joo jihna ñúhú ndítahan caja ndó ña.

Mé ndó jánaha ndó nuú ñayivi ña a váha toho caja cuíhná na joo cúu ndó na cuíhná. ²² Mé ndó jánaha ndó nuú ñayivi ña a váha toho coo in ta xihín in ñañáha, ña co cúu ñájíhí da joo íin ndó xihín ñájíhí inga na. Mé ndó co cúní ndó yoco ndindojo veñuhu ñayivi, na coo naquixi chichi Israel joo cája cuíhná ndo ña cuicá ñúhu veñuhu na cán. ²³ Cája cáhnu ndó mé va ndó jáchi cómi ndo ley Ndióxi joo co cája cáhnu ndó mé á jáchi co cúní ndó caja ndó ña sáhdá mé ley. ²⁴ Ña cán quéa ndaa cáhan tuhun Ndióxi saha ndó tá cáhí a já: “Ñayivi, na coo naquixi chichi Israel cáhan núu na saha Ndióxi sahá ña cája mé ndó, na Israel”, cáhí tuhun Ndióxi.

²⁵ Tá cája ndó ña sáhdá ley Moisés já quéa ndiyahvi marca nachicaan na yiquí cuñu ndó. Joo tá co cája ndó ña sáhdá ley Moisés já quéa co ndiyahvi toho marca nachicaan na yiquí cuñu ndó. ²⁶ Na coo naquixi chichi Israel co chicaan toho na mé marca jan yiquí cuñu na joo tá cája na ña sáhdá ley Moisés já ndiquehe Ndióxi na tá quiahva ndiquehe ri mé á na íin marca yiquí cuñu. ²⁷ Ndá na cája ña cáhí ley vatí coo naquihvi marca yiquí cuñu na, íin sahá na cán chicaan na cuachi jatá na co cája ña cáhí ley vatí íin a nu ná ta naquihvi marca yiquí cuñu na. ²⁸ Ña cán quéa tá ná caja in na naquixi chichi Israel mé costumbre ña ná cuni cuití va ñayivi ña já quéa a juú ña ndaa ña cúu ná cuéntá Ndióxi. Ta ndá na chicaan na marca yiquí cuñu na co cája na mé costumbre cuéntá yiquí cuñu cuití va na. ²⁹ Ta ndá na naquixi chichi Israel tá mé a ndaa cúu ná cuéntá Ndióxi ta cája na ña cúní mé á co cúu á sahá ña nasahnda loho

na yiquí cuñu na. Cúú á sahá ña ñacaja ínimā yii Ndióxi ini na. Ta mé ña cán jácavatá ña ini Ndióxi jáchi xihín ínimā yii mé á cája na ña cúni mé á.

3

¹ Sahá ña cán quéa ná ndaca tuhún i ndohó ña yóho: Á ín cuahá chága sahá ñayivi ñaquixi chichi Israel a juú ga sahá java ga ñayivi. Á ndiyahvi nu Ndióxi ña nachicaan ña marca yiquí cuñu na.

² Ajan. Ín cuahá sahá ñayivi ñaquixi chichi Israel ta tá nachicaan ña marca yiquí cuñu na ndiyahvi a nu Ndióxi jáchi nasacu ini a jándacoo a tuhun a nuú ña ñaquixi chichi Israel já ná cacomí ña cuéntá sahá. ³ Ta vatí ná caja java ñayivi, ña cándéé ini mé á ña cō cúni mé á caja na joo ama sahá ña cán a ndíjama toho Ndióxi jini á ña ná caja ña núu xihín ná, vaha. ⁴ Cō cája toho Ndióxi já. Ña cája Ndióxi níi tiempo cúú ndinuhu ña ndaa vatí tóco ndihi ñayivi cáhan ña ña tuhún. Já cáchi tuhun Ndióxi já:

Xihín tuhun cáhan Ndióxi cándaa iní ña cúú á Ndióxi ña ndaa

ta a cúu quee vaha ña chicaan cuachí jíquí jatá jáchi cúú mé á in Ndióxi ndaa, já cáchi tuhun mé á.

⁵ Ta viti ná cahan i xihín ndó tá quiahva cáhán ñayivi ñuyíví. Cáhán ña ña cō cája vaha Ndióxi tá jándoho a mí sahá cuachí jáchi xihín cuachí jándindita jíc chága yó Ndióxi. Ta xihín ña cája í náha ña cúú Ndióxi in Ndióxi ña ndaa ta mí cúú yó ñayivi cuachi. ⁶ Joo cō cáhán vaha na jáchi tá cō cája ndaa Ndióxi, nduu já quéa a cúú caja vii mé á sahá ndihi cuachi cája tóco ndihi ñayivi ndúu ñuyíví.

7 Já cáchí ñayivi já: “Cóho ná caja yó cuachi já ná candaa chága ini ñayivi ña caja ndaa Ndióxi ta xihín ña yóho caja cáhnu chága na mé á”, cáchí na. Joo co cáhan vaha na jáchi tá cáhán yo ña xihín cuachi cája í ndicáhnu chága Ndióxi já quéa co cándaa ini ndá saha quéa jándoho Ndióxi ini ñayivi sahá cuachi na. 8 Joo java ñayivi cáchí na: “Cóho ná caja í cuachi já ná caja cáhnu ini mé á sahá cuachí já ndicáhnu chága Ndióxi”, cáchí na joo co cáhan vaha na. Ta java ñayivi cáhan ihvi na sahá yehe ta chicaan na cuachi jatá i ta cáchí na ña jánaḥa yehe ña yóho nuú ñayivi. Ndítahan jándoho Ndióxi ini tóco ndihi ñayivi, na jánaḥa ña yóho.

Tóco ndihi ñayivi ndúu ñuyíví cómí na cuachi nu Ndióxi

9 Ña cán quéa a cuú cachi yó ña cúu mí na vaha chága a juú ga inga ñayivi sahá ña naquixí chichi Israel. Jáchi sa najánaḥa i nu ndo ña mí, na naquixi chichi Israel xihín na coó naquixi chichi Israel cúu yó ñayivi cája cuachi. 10 Já cáchí tuhun Ndióxi já: Coó toho ni in ñayivi cája ña ndaa.

11 Ta coó toho ni in na cándaa ini ña ndaa, ta coó ni in na ndínducú Ndióxi.

12 Naçaxoo na nu Ndióxi já naquehe na ichí núu cuahan na.

Coó ñayivi cája ña vaha janda ni in túhún na coó.

13 Quini ndivaha yúhu ná jáchi cúu á tátuhun in yávi ndii ña cámaní ndee ñúhu.

Cúu ná ñayivi túhún ndivaha.

Tá quiahva cája coo tá tীন rí ñayivi já cája na cán tá cáhan na ña túhún.

14 Ta mé cháhan cuití cáhan yúhu ná ta xihín ña yóho jatahvi na ini ñayivi.

15 Níi tiempo ndícají ini na cahní na ndji ta xihí ndji cája na.

16 Ta ndá nu xínu na jándoho na ini ñayivi jándacoo ndáhví ñahá na.

17 Ta co xini na ndá a quéa canduu vaha na xihín ñayivi.

18 Ta ni co cándaá ini na ña ndítahan nu ná cayihví na Ndióxi, cáchí tuhun Ndióxi.

19 Sa xini yó ña ndítahan nuú na Israel caja na tóco ndihi ña sáhdá ley Moisés jáchi cúu á cuénta na naquixi chichi Israel. Ta xihín ña yóho chícaan ley Moisés cuachi jata mé na cán ta náha ña tóco ndihi ñayivi ndúu ñuyiví cómi na cuachi nu Ndióxi ta a cuú cachi na ña co cómi na cuachi. 20 Ni in ñayivi a cúu nduu ndaa na nu Ndióxi sahá ña cája na tóco ndihi ñaha sáhdá ley Moisés. Ña cája mé ley quéa ña ná candaá ini ña cómi yo cuachi nu Ndióxi.

Jáçacu Ndióxi mí jáchi cándeé ini mé á

21 Viti jánaḥa Ndióxi nu yo ndá quiahva nduu ndaa yo nu mé á. Ta jári cáchí mé ley xihín na profeta sahá ña yóho. Ta co cúu á sahá ña cája í ña cáchí mé ley 22 joo sahá ña cándeé ini ñayivi Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándeé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúu na Israel. 23 Tóco ndihi ñayivi cómi na cuachi nu Ndióxi ta naçaxicá na nu á ta a cuú nduu na ñayivi vaha tá quiahva cúni mé á. 24 Joo naçaja Ndióxi in

ñamanì cáhnu xihìn yò já ná nduu ndaa yó nu mé á. Ta coó nachahví sahá jáchi nachahví Jesucristo sahá cuachi tá naxihì a ndica crúxu. Ta viti co cómi ga yó cuachi nu mé á. ²⁵ Nachindahá Ndióxi Jesucristo ña ná cuita ñi a sahá cuachi já ná cuu caja cáhnu ini Ndióxi saha yò tá ná candeé ini Jesucristo. Xihín ña yóho náha ña cúú á in Ndióxi ndaa. Tá camaní quivi Jesucristo sahá cuachi já coó naquehe Ndióxi cuénta sahá cuachi. Já nacaja mé á jáchi cáhnu ndivaha ini a. ²⁶ Ta xihín ña yóho náha ña mé a ndaa táhyí cúú á in Ndióxi ña ndaa janda quivi viti. Tóco ndihi na candeé ini Jesús cúú ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúú á Ndióxi ndaa.

²⁷ Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuú nduu ndaa yó nu Ndióxi sahá ña nasacu vaha í ley Moisés. Cúú á sahá ña candeé ini Jesús. ²⁸ Sahá ña cán quea sa xini yó viti ña nduu ndaa yó nu Ndióxi tá ná candeé ini Jesús cuití va. Ta co cúú á sahá ña nasacu vaha í ña sáhdá ley Moisés.

²⁹ Á cája Ndióxi ña yóho sahá na naquixi chichi Israel cuití va, vaha. Uhun. Jáchi jácacu Ndióxi na naquixi chichi Israel xihín na coó naquixi chichi Israel. ³⁰ Jáchi in in talaá Ndióxi ta mé Ndióxi yóho jácacu a ñayivi tá ná candeé ini na mé á vatí cúú ná na Israel á co cúú toho ná. ³¹ Á cacu xoo í ley Moisés, da já. Uhun. Vatí candeé ini Jesús joo a cuú cacu xoo í ley Moisés jáchi náha ña cúú á ña ndaa ta ndiyahvi a nu yò.

Ña ñacaja Abraham ñahá ndivaha

¹ Ta ndá saha ñacachi Ndióxi sahá Abraham, tásáhnü jícó yó ña ñanduu da ña ndaa nü mé á.

² Co cúú á sahá ña ñacaja da ña ñanduu da ña ndaa nü Ndióxi já ná a cája cáhnu da mé dá. Ta coó toho ñaha ña cuu caja cáhnu da mé dá saha. ³ Jáchi já cáchí tuhun Ndióxi: “Ñacandeeé ini Abraham Ndióxi sahá ña cán queá ñanduu ndaa da nü mé á”, cáchí tuhun Ndióxi.

⁴ Ta viti ná caja í cuéntá cája chúun in dataa. Ta tá ñandihí cháhvi na nü dá ta mé jihún cán co cúú á ña jása ña nü dá. Cháhvi na nü dá jáchi cáni a nü dá quehe da ña sahá chuun ñacaja da.

⁵ Jáchi a cúu ndaja ndaa ñayivi mé ná nü Ndióxi sahá ña cája na. Tá ná candeeé ini ñayivi Jesús, mé a ñacháhvi sahá cuachi anda jávi ndaja Ndióxi ña ñayivi ndaa nü mé á.

⁶ Ta quiahva já ñacahan rey David sahá ña yóho tá ñacachi da ña tahví ñahá ñacuu da ndája ndaa Ndióxi vatí coó ñacaja da ñaha ña ná cuu ndaja ndaa da mé dá nü Ndióxi.

⁷ Já ñacachi David já: Tahví ñahá ñacuu ñayivi tá ñacaja cáhnu ini Ndióxi sahá ña núu ñacaja na ta tá najándo a cuachi na.

⁸ Ta tahví ñahá ñacuu ñayivi tá coó ñaquehe Ndióxi cuéntá sahá cuachi ñacaja na, ñacachi David ñahá ndivaha.

⁹ Á tahví ñahá ñacuu ña ñachicaan marca yiquí cuñu cuití va. Uñun. Jáchi ndúu ndaa ñayivi nü Ndióxi sahá ña cándeeé ini na mé á ta co cúú á sahá ña ñachicaan ña marca yiquí cuñu á coó a. Ta sa xini yó ña ñacachi Ndióxi ña ñanduu Abraham ña ndaa nü mé á sahá ña ñacandeeé ini da mé á. ¹⁰ Á ñacachi Ndióxi ña cúú Abraham ña ndaa

nu mé á tá cámaní chicaoan da marca yiquí cuñu da á tá nandihí nachicaoan da marca yiquí cuñu da. Nacachi a já xihín dá tá cámaní chicaoan dá marca yiquí cuñu da. ¹¹ Jihna ñuhú nacandeeé ini Abraham Ndióxi anda jáví nacachi a ña cúú Abraham taa ndaa nu á. Tá nandihí já nachicaoan da in marca yiquí cuñu da já náha ña mé a ndaa nanduu da taa ndaa nu Ndióxi jáchi nacandeeé ini da mé á. Xihín ña yóho naxinu Abraham nanduu da tátuhun tátá tóco ndihí ñayivi, na candeeé ini Ndióxi vatí coó nachicaoan na marca yiquí cuñu na. Ta vatí coó nachicaoan na mé marca yóho yiquí cuñu na joo cúú ná ñayivi ndaa nu Ndióxi. ¹² Ta quiahva já nanduu Abraham tátá na ín mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña candeé cáhnu ini na Ndióxi tá quiahva nacandeeé ini Abraham mé á tá cámaní chicaoan da marca yiquí cuñu da.

Jáxinu coo Ndióxi tuhun sahan nu yo tá ná candeeé iní mé á

¹³ Sanahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quivi ñehé táhvi ná ña ná nduu ñuyivi ñaha mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandeeé ini da mé á ta já nanduu ndaa da nu Ndióxi. ¹⁴ Joo tá mé a ndaa na nasacu vaha ley cúú na ñehé táhvi cuhun indiví já quea coó chuun candeé ini Ndióxi, dá já. Jáchi xihín ña yóho jándacoo núu í tuhun nasahan Ndióxi nu yo ña caja mé á xoho. ¹⁵ Ndítahan nu Ndióxi jándoho a ini ñayivi tá co cája

na ña sáhndá ley Moisés. Joo tá coó toho mé ley já quéa coó toho cuachi ñayivi nu ley.

¹⁶ Naṣahan Ndióxi tuhun a nu Abraham sahá ña naṣandeeé ini da mé á. Ta sahan mé á tuhun a nu yo tá cándéé ini mé á. Coó a cája toho a á cája í ña sáhndá ley Moisés á co cája toho í ña jáchi mé a ndaa ndiquehé ña vaha sahan Ndióxi nu yo tá cándéé ini mé á tátuhun naṣandeeé ini Abraham mé á. Ta cúú á tátuhun nanduu Abraham tátá tóco ndihi na cándéé ini Ndióxi. ¹⁷ Já cáchí Ndióxi já xihín Abraham: “Naṣaja í ña ná nduu mún tátá ñayivi ndúu cuahá nación”, já cáchí tuhun Ndióxi sanahá. Mé Abraham cúú dá tátuhun tátá ndihí nu Ndióxi. Naṣandeeé ini da Ndióxi, mé á cuu jánditacu tucu ndji ta xihín tuhun cáhan mé á cája ña ná coo ña coó naṣahjin jihna.

¹⁸ Vatí coó naxinu nuú tuhun naṣahan Ndióxi nu Abraham joo naṣandeeé tá naṣandeeé ini da Ndióxi ta naṣandati da jáxinu coo mé á tuhun a. Já nanduu da chichi nuú naquixi cuahá ñayivi, na ndúu cuahá nación. Já nayaha jáchi já naṣachi Ndióxi xihin dá sanahá: “Ndicuahá ndivaha ñayivi quixi chichún”, naṣachi Ndióxi xihin dá. ¹⁹ Ta naṣandeeé ini Abraham Ndióxi ña cacu jahyi da vatí sa naṣayati quivi xinu da in ciento cuia ta vatí sa cándaá cáxi ini da ña jalóho cuití va quivi catacu da ñuyiví yóho xihin Sara, ñájihí da. Ta sa cándaá ini da ña a cuú ga cacu jahyi ná joo naṣandeeé ini da Ndióxi. ²⁰ Ta coó naṣavitá ini da ta coó nandicaní ivi johó ini da sahá tuhun naṣahan Ndióxi nu dá. Joo nanduu ndeeé chága ví ini da já ná cándéé cáhnu chága ví ini da Ndióxi ta naṣaja cáhnu da mé á. ²¹ Já naxinu ini da ña mé a ndaa táhyí ín ndée Ndióxi

ná jáxinu a tuhun sáhan nuú ñayivi. ²² Naçandeeé ini Abraham Ndióxi sahá ña cán queá naçachi a ña nanduu da taa ndaa nu mé á.

²³ Ta tá cáchi tuhun Ndióxi ña nanduu Abraham taa ndaa nu Ndióxi sahá ña naçandeeé ini da mé á já queá coó naçahyi ña yóho sahá Abraham cuití va. ²⁴ Naçahyi ri a saha mí jáchi tá ná candeeé ini Ndióxi, mé á najánditacu Jesús, xitoho í tañu ndii já queá ndiquehe Ndióxi mí ta ndaja mé á mí ña ná nduú ñayivi ndaa nu mé á. ²⁵ Ta nandiquiahva na Jesús ña ná quivi a ndica crúxu sahá cuachí. Ta tá nandihhi nanditacu tucu a ña ná nduú ñayivi ndaa nu mé á.

5

Naçaja Ndióxi ña ná nduu ndaa yó nu mé á

¹ Sahá ña cán queá coó ga cuachi jata yo jáchi naçandeeé ini Ndióxi ta nandique táhan máni yó xihin á sahá ña naçaja Jesucristo, xitoho í. ² Ta sahá ña cándeeé ini Jesucristo sahá ña cán queá cája Ndióxi cuahá ñamaní xoho. Cándeeé ini mé á ta cájii ini ndátí cuhun í coo í xihin mé á. ³ Ta quiahva já cájii ini tá ná quixi tondóho nu yo jáchi sa xini yo ña ndindacú chága ini cuéntá Ndióxi tá ndóho í tondóho. ⁴ Tá sa nandindacú ini cuéntá Ndióxi naçaja tondóho anda jáví táhan ini Ndióxi xihin yo jáchi naçito ndojó mé á mí ta nandindacú chága ini cuéntá mé á. Tá natahan ini Ndióxi xihin yo anda jáví candaá vaha ini ña jáxinu coo mé á tuhun naçahan a nu yo. ⁵ Tá ndátí ña naçahan Ndióxi tuhun a quiahva nu yo já a cándoo núu toho Ndióxi xihin yo jáchi najándicutú Ndióxi ínima yo xihin ña

quíhvi ini a mí. Naçaja Ndióxi ña yóho xihin ínima yii mé á ña nasahan nu yo.

⁶ Sahá ña co ndée yo jácací mí sahá ña cán quéa naxihí Jesucristo saha yo ta coó naçayáncá a quivi a ta ni coó naxihí yachi a. Naxihí a mé quivi nanditahan quivi a sahá cuachi ñayivi quini. ⁷ Ihvi ndivaha cáa já queta in ñayivi quivi na sahá inga ñayivi vatí cúú ná na vaha. Joo mé a ndaa cuu queta in ñayivi coo tiahva na quivi na sahá in na cúú na vaha ndivaha. ⁸ Náha Ndióxi nu yo ña mé a ndaa táhyí quíhvi ini a mí jáchi vatí cúú yó ñayivi cája cuachi joo naxihí tá naxihí Jesucristo saha yo. ⁹ Ta viti sa nanduú ñayivi ndaa nu mé á sahá nii Jesucristo, dó naxita saha yo. Ta sa saha mé á cacu ndaa ínima yo já ná a cójo ini Ndióxi sahá cuachí. ¹⁰ Nasacuú na coó naxini táhan vaha xihin Ndióxi joo sahá ña naxihí in túhún jini já jahyi mé á sahá ña cán quéa nandique táhan máni yó xihin á viti. Xihín ña yóho cuu cacu ndaa ínima yo jáchi nanditacu tucu Jesucristo ta sa nandique táhan máni yó xihin Ndióxi viti. ¹¹ Ta a juú ña yóho cuití va vaha jáchi cájii ndivaha iní xihin Ndióxi sahá ña naçaja Jesucristo, xitoho í. Sahá ña cán quéa naxinu yó nandique táhan máni yó xihin Ndióxi.

Ña naçaja Adán xihín ña naçaja Jesucristo

¹² Ta sahá cuachi naçaja in taa naní Adán sahá ña cán quéa nandihvi cuachi ñuyiví yóho ta tá nandihvi cuachi ñuyiví já naçasahá xihí ñayivi. Tóco ndihí cája í cuachi ta sahá ña yóho nditahan quivi ndihí. ¹³ Tá cámaní quiahva Ndióxi ley mé á nu Moisés nasacomí tóco ndihi ñayivi cuachi. Joo co quéhe Ndióxi cuéntá sahá cuachi jáchi coó toho

ley nasahiin tiempo já. ¹⁴ Janda tiempo nasahiin Adán nasasáhá xíhí ñayivi sahá cuachi na ta janda naxinu tiempo nasahiin Moisés naxihí na vatí coó nacija na mé cuachi nacija Adán. Nasacomí Adán cuachi jáchi naquehe núu da ña nacachi Ndióxi xihín dá. Ta mé Adán yóho nasacuu da tátuhun yuhú nuú da quixi tá nu ndíhí.

¹⁵ Joo a cuú jándique táhan í cuachi nacija Adán xihín tóco ndihi ña vaha sahan Ndióxi nu yo. Jáchi sahá cuachi nacija in túhún taa, xíhí cuahá ndivaha ñayivi. Joo ñamaní nacija Ndióxi xoho sahá ña nacija in túhún taa naní Jesucristo cúú á in ñamaní cáhnu ndivaha ña ñéhe táhvi cuahá ndivaha ñayivi. ¹⁶ A cuú jácatáhan í cuachi nacija in dataa xihín ñamaní cája Ndióxi xoho jáchi saha in túhún cuachi naxinu cháhan jatá ñayivi ta já nasasáhá xíhí na. Vatí nandicuahá cuachi ñayivi joo nacija Ndióxi ñamaní xihín ná já nandaja ndaa mé á na ta nacachi a ña coó ga cuachi na nu mé á. ¹⁷ Sahá cuachi nacija in túhún taa naní Adán nasasáhá xíhí ñayivi. Joo sahá ña nacija in túhún taa naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamaní cája Ndióxi xoho ña cán quéa ñéhe ndeé chága iní yo caca í íchi cuéntá Ndióxi sahá ña nacija Jesucristo.

¹⁸ Sahá cuachi nacija Adán nacachi Ndióxi ña cómi tóco ndihi ñayivi cuachi nu á. Joo sahá ña ndaa nacija Jesucristo nacachi Ndióxi ña ndá ñayivi nacuu cuu nduu ndaa na nu mé á jáchi co cómi ga na cuachi nu á. ¹⁹ Sáa nasahiin ini Adán jáchi coó naxeén da caja da ña cúni Ndióxi. Ta sahá ña nacija Adán cuahá ndivaha ñayivi nanduu na ñayivi cuachi. Joo nacija Jesucristo tóco ndihi

ñā cúnī Ndióxi ta xihín ñā ñacaja in túhún taa Jesucristo ñanduu ndaa cuahá ndivaha ñayivi nu Ndióxi.

²⁰ Tá ñasahan Ndióxi ley nu Moisés já ñacandaa ini ñayivi ñā cuahā chága cúú cuachi na. Joo tá ñandicuahá cuachi ñayivi já ñatahvi chága ini Ndióxi saha ná. ²¹ Ñandihvi cuachi ñuyiví ta ñasacomí a cuéntá sahá ñayivi. Ta sahá ñā ñacaja na cuachi sahá ñā cán quéa ñacasáhá xihí ñā. Joo ñacaja Ndióxi cuahá ñamaní xihín yō ta ñasacomí a cuéntá saha yō já ná cuu nduú ñayivi ndaa nu mé á ta já ná cuu cacu ndaa ínima yō anda ama cáa quiví sahá ñā ñacaja Jesucristo, xitoho í.

6

Ñaxihí yó nuú cuachi joo tácu yō xoo Jesucristo

¹ Ama ná cachi xihín táhan í: “Cóho caja tá caja í cuachi já ná coo cáhnu chága ini Ndióxi saha yō.”

² Ama ná cachi rí já jáchi cúú yō tátuhun ñā sa ñaxihí nuú cuachi ta tá sa ñaxihí yó nuú cuachi ama ná cacomí ga cuachi cuéntá saha yō. ³ Tá ñacandúta yō cuéntá Jesucristo cúú á tátuhun in yó ñaxihí xihín Jesucristo. ⁴ Jáchi tá ñacandúta yō já cúú á tátuhun in yó ñanduxu xihín Jesucristo ta ñaxihí yó nuú cuachi. Ta tá ñajánditacu Ndióxi Jesucristo já cúú á tátuhun in yó ñanditacu xihín mé á. Jáchi xihín ndée cáhnu Ndióxi, tátá yō ñanditacu Jesucristo ta sa xihín mé ndée cán cuu caca í ichí saá viti.

⁵ Tá quiahva in ñanduú xihín Jesucristo tá ñaxihí a quiahva já in ñanduú xihín á tá ñanditacu a. ⁶ Tá cámaní cándéé iní Jesús já ñacatóo ndivaha

í cája í cuachi jáchi nasahnda cuachi chuun nu yo. Joo sahá ña naxihí Jesucristo ndica crúxu sahá ña cán quéa najándacoo í cuachi cája í ta viti co sáhdá ga cuachi chuun nu yo. ⁷ Jáchi tá sa naxihí in dataa co sáhdá ga cuachi chuun nu dá ña cán quéa cúu á tátuhun sa naxihí yó xihin Jesucristo sahá ña cán quéa co sáhdá ga cuachi chuun nu yó viti. ⁸ Ta cúu á tátuhun naxihí yo tá naxihí Jesucristo ña cán quéa xini vaha í ña cuhun yó coo í nu íin mé á anda ama cáa quivi. ⁹ Sa xini yo ña nanditacu tucu Jesucristo ta a ndíco coo ga quivi a jáchi ni in ñaha a cuú caja ña ná quivi tucu a. ¹⁰ In táláa tañu naxihí a sahá cuachi ta viti xihin chí nuu co ndítahan ga nu á quivi a sahá cuachi. Ta viti tácu Jesucristo cuénta Ndióxi. ¹¹ Ña cán quéa ndítahan catacu ndó ñuyivi yóho tátuhun na sa naxihí nuú cuachi já ná a cáhdá ga cuachi chuun nu ndo. Ndítahan catacu ndó cuénta Ndióxi ña in ná nduu ndó xihin Jesucristo.

¹² Ña cán quéa a quiáhva ndó ñamaní nuú cuachi ña ná cacomí a cuénta sahá yiquí cuñu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó. ¹³ A ndiquiahva ga ndó yiquí cuñu ndó ndáha cuachi ná a cája ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña ná caja ndó ña vaha. ¹⁴ Co cómi ga cuachi cuénta saha ndó viti jáchi tácu ndo sahá ñamaní cája Ndióxi ta co tácu ndo sahá ña sácú

vaha ndó ley Moisés.

Ndítahan nu yo ndicaxi ndá íchi candico yo

¹⁵ Ama ná caja rí cuachi sahá ña co cómi ga ley Moisés cuéntá saha yo. Uhun. A cája toho í ña jáchi xihín ñamaní cája Ndióxi xihín yo cánda iní ña cómi mé á cuéntá saha yo. ¹⁶ Sa xini ndó ña ndiquiahva in mozo mé dá ndáha xitoho da ta cája da ndá chuun nacuu ña sahan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cahun ndó indayá. Ta tá ná ndicaxi ndó caja ndó ña cuni Ndióxi já quéa cacuu ndó cuéntá mé á ta caja mé á ña ná nduu ndaa ndó nu á viti. ¹⁷ Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuéntá Ndióxi. ¹⁸ Nandoo cuachi ndó ta co cúu ga ndó mozo cuéntá cuachi viti. Nandu ndó mozo cuéntá Ndióxi ta cája ndó ña ndaa viti. ¹⁹ Najána ha i sahá in mozo nu ndó já ná canda vaha chaga ini ndó ña ndaa. Mé ndó nasacuu ndó tátuhun mozo jáchi jihna nandiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nahvi ini ndó caja ndó. Joo viti nandiquiahva ndó mé ndó ndahá Ndióxi ta nasacu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yii nu mé á.

²⁰ Tá nasacuu ndó mozo cuachi coo naxeén ndó caja ndó ña ndaa ña cuni Ndióxi. ²¹ Ni in ña vaha coo nañehe ndó saha cuachi nacaja ndó. Ta viti cácan nuu ndo saha mé cuachi nacaja ndó. Ta

ndá ñayivi sá cája cuachi cuhun na coo na indayá anda ama cáa quivi. ²² Joo co cómi ga cuachi cuénta saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cúní mé á jáchi já xinu coo ndó cacuu ndó ñayivi yíi nu Ndióxi ta já cuhun ndó coo ndó xihin mé á anda ama cáa quivi. ²³ Jáchi tá cája í cuachi cúu á tátuhun ndíyíca yo nu Ndióxi sahá ña nacaja í ta ini indayá चाहví sahá. Joo ñamaní cája Ndióxi xoho sahá ña naxihí Jesucristo, xitoho í cúu á ña cohó catacú indiví xihin mé á anda ama cáa quivi.

7

Có cómi ga ley cuénta saha yo

¹ Candehé ndo ñani mí i, na cúu cuénta Jesús. Sa xini vaha ndó ley Moisés ta sa xini ndó ña cómi ley cuénta sahá ñayivi nani tácu cuití va na. ² Cúu á tátuhun tá natandaha in ñañáha xihin in dataa já quea cáchi ley cúu ña ñájíhí da anda ná xinu coo quivi quivi da. Joo cáchi mé ley ña tá sa naxihí da co cúu ga ña ñájíhí da. ³ Sahá ña cán quea cuu tandaha tucu ña xihin inga ta jáchi co sahdá ga mé ley chuun nu ña. Ta co cája ña cuachi nu Ndióxi tá ná tandaha tucu ña jáchi sa naxihí va yíi ña. Joo tá ná tandaha tucu ña nani tácu yíi ña já quea cája ña cuachi nu Ndióxi.

⁴ Ta quiahva já ndóho ri ndóhó va ñani mí i, na cúu cuénta Jesús. Cúu á tátuhun naxihí ndó nu ley Moisés ña cán quea co cómi ga mé ley cuénta saha ndo. Ta viti núná nu Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu caja í ña vaha, ña cúní Ndióxi.

⁵ Tá cámanj candeé iní Jesucristo ña caja í ndinuhu ña núu ña ñasacahvi iní caja í. Vatí sa xínj yó ña cáchí mé ley joo ña caja chága yó cuachi ña ñacahvi iní caja í. Ña cán quéa ñanditahan nu yó quiví ná cuhun í ndoho iní indayá, nduu. ⁶ Joo ña caja Ndióxi ña ná janj yó nuú ña sáhdá ley Moisés ña ñasacomí cuéntá saha yo. Ta viti núna nu yó caja í ña cúni mé á jáchi ñandijama ínimaj yij Ndióxi mí sahá ña cán quéa co cómi ga ley, ña ñacahyí ña jihna cuéntá saha yo viti.

Cája tá cája í cuachi vatí candeé iní Jesucristo

⁷ Á cúni cachi ña yóho ña a váha toho ley Moisés. Uhun. Ña váha cúu á jáchi xihín ña cáhan mé ley cándaaj váha iní ndá a cúu cuachi. Já cáchí mé ley já: “A ndiáva toho iní ndó cacomí ndó ñaha cómi inga na”, cáchí a. Ña cán quéa cándaaj iní viti ña a váha toho tá ná caja j já. ⁸ Tá ná a cóo toho ley, nduu já quéa a cándaaj iní j ña cúu cuachi. Ta coó toho cuachi caja j tá coó ley, nduu. Joo viti cándaaj iní j ña a váha toho ndiáva iní j cacomí j ñaha ñani táhan j jáchi cáchí ley a cája j ña. Ña cán quéa ñandihvi cuachi iní j ta ñacasáhá cáhvi iní j ndaja caja j cacomí j ñaha inga na. ⁹ Tá cámanj candaa iní j ña cáchí ley Moisés já ñacahán j cúu u da váha. Joo tá ñatandaa quiví natacu iní j xihín ña cáchí ley Moisés anda javí ñacandaaj iní j ña ñúhu cuachi iní j ta ñacandaaj iní j ña cúu u da cája cuachi ta ndítahan nuú j cuhun j indayá sahá. ¹⁰ Tá ná cuu caja ñayivi tóco ndihi ña cáchí ley Moisés já cuhun ña coo na nu íin Ndióxi anda ama cáa quiví. Joo coó ñacuu caja j ña cáchí mé ley sahá ña cán quéa nditahan

nuú i cuhun i indayá sahá. ¹¹ Najándahvi cuachi yehe jáchi nacahán i cuu cuhun i indivi sahá ña caja i ña cáchi ley joo sahá ña coó nacuu xinu coo i caja i ña sahá ña cán quéa cuhun i indayá.

¹² Ta yii ndivaha cúu ley Moisés. Ta yii ndivaha cúu tuhun nasahnda Ndióxi caja í. Ta cúu á ña ndaa ta cúu á ña vaha. ¹³ Ama ná jáqueta nuu ley yehe ini indayá nani cúu á ña vaha. Uhun. A cúu cuití caja ley jáqueta nuu a yehe ini indayá. Cuachi quéa ndúcú chindahá yehe cuhun i indayá. Nañehe íni cuachi cañehe a yehe cuhun i indayá saha ley. Xihín ña yóho cándaa ini i ña quini ndivaha cúu cuachi ta vaha ndivaha cúu mé ley.

¹⁴ Sa xini yo ña cúu ley cuénta Ndióxi joo yehe cúu u in da caja cuachi ta caja i ña núu jáchi mé cuachi cómi a cuénta sahá i. ¹⁵ Co cándaa ini i ña caja i jáchi cuni caja i ña vaha joo co caja i ña. Ña caja i quéa mé ñaha ña cándají i. ¹⁶ Tá caja i cuachi ña co cuni caja i já cándaa ini i ña vaha cúu ley. ¹⁷ Mé a ndaa co cuni caja i cuachi joo cuachi ndácaan ini i cúu á ña jácahan yehe caja i ña. ¹⁸ Sa xini ña co ndeé yiquí cuñu i caja ña vaha jáchi coo ña vaha ndácaan ini i. Vatí cuni caja i ña vaha joo co sahan mé á caja i ña. ¹⁹ Cuni caja i ña vaha joo co caja toho i ña. Ña caja i cúu á ña núu ña co cuni caja i. ²⁰ Caja i ña co cuni caja i já cándaa ini i ña cuachi ndícaan ini i quéa chindahá nihni a yehe caja i ña núu.

²¹ Cándehé ndo ña yóho: Vatí cuni caja i ña vaha joo caja i ña núu jáchi ña cán cuití va xinu íni i caja i. ²² Janda ínimá i xinu coo ña cátóo i caja i ña cahan ley Ndióxi. ²³ Joo ndácaan inga ñaha ini i ta cáni táhan mé ñaha cán xihín xini túní i. Ta mé ñaha

ndácaan ini i cúu á cuachi. Ta cándeé cuachi xihín i já sáhdá a chuun nuú i.

²⁴ Ndáhví nahá nacuu u. Yo cuu jácacu yehe ná a cája ga i cuachi ña cañehe yehe cuhun i indayá.

²⁵ Ndíquiahva i ndixahvi nu Ndióxi jáchi xihín ña nacaja Jesucristo, xitoho í cuu jácacu Ndióxi yehe já ná a cája ga i cuachi. Ña cán quéa cándaá ini i ña ndítahan cája i ña sáhdá ley Ndióxi joo cuachi ndícaan ini i sáhdá chuun nuú i.

8

Ndíco í in íchi nu cája í ña cúní ínimá yíi Ndióxi

¹ Ta sahá ña in nanduú xihín Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña xíca ini yiquí cuñu í. Ña cája í cúu ña cúní ínimá yíi Ndióxi. ² Jáchi xihín ña nacaja Jesucristo najácaacu ínimá yíi Ndióxi mí ta nasahnu a cuachí já ná a cuhun yó indayá. ³ Coó nacuu caja í tóco ndihi ña sáhdá ley Moisés ña cán quéa coó nacuu nduu ndaa yó nu Ndióxi xihín mé ley. Ña cán quéa nacaja Ndióxi inga ñaha tá nachindahá mé á Jesucristo, jahyi a. Nanduú Jesucristo in ñayivi ta tá quiahva cácu ñayivi quiahva já nacacu Jesucristo ñuyíví. Ta tá naxihí mé á ndíca crúxu já nachahvi a saha tóco ndihi cuachí sahá ña cán quéa co sáhdá ga cuachi chuun nu yo. ⁴ Ta nacaja Ndióxi ña yóho já ná cuu xinu coo í caja í ña sáhdá ley mé á tá ndáca ínimá yíi Ndióxi mí. Jíin va caja í viti jáchi co ndúu ga yó ndahá cuachi.

⁵ Ñayivi, na cája ña xíca ini yiquí cuñu, na cán cúu na ndícani cuahá ini sahá yiquí cuñu. Joo na cája ña cúní ínimá yíi Ndióxi na cán cúu ná ndúcú jácavatá

na Ndióxi. ⁶Tá ná ndicani cuahá ini na sahá ña cúní yiquí cuñu na já queá cuhun na indayá. Joo tá ná ndicani ini na sahá ña cúní ínimá yíi Ndióxi já queá coo vaha ini na ta ñehe táhvi ná cuhun na indiví. ⁷Joo ñayivi ndicani ini saha yiquí cuñu, na cán cúú ná na ihvi Ndióxi jáchi co cúní na caja na ña cáchí ley Ndióxi ta ni a cuú caja na ña. ⁸Sahá ña cán queá tá cómí cuachi cuéntá saha ná já queá a cuú caja na ña cájii ini Ndióxi xihin.

⁹Ta tá mé a ndaa ndácaan ínimá yíi Ndióxi ini ndó já queá co ndíco ga ndó íchi cuéntá ña núu, ña nasacaja ndó jihna. Ta viti ndíco ndó íchi vaha ta cája ndó ña cúní Ndióxi. Jáchi ndá na co ndácaan ínimá Jesucristo ini, na cán co cúú ná cuéntá mé á. ¹⁰Tá ndácaan Jesucristo ini ínimá ndo vaxi quívi quivi yiquí cuñu ndó sahá cuachi nacaja ndó. Joo mé a ndaa catacu ínimá ndo nu ín Ndióxi anda ama cáa quívi jáchi nanduu ndaa ndó nu Ndióxi nacaja mé á. ¹¹Nacaja ínimá yíi Ndióxi ña ná nditacu tucu Jesucristo ta tá ndácaan ínimá yíi Ndióxi ini ínimá ndo já tandaa quívi caja mé á ña ná nditacu tucu yiquí cuñu ndó saha mé ínimá yíi Ndióxi ndícaan ini ndó.

¹²Candehé ndó ñani mí i, na cúú cuéntá Jesús. Co ndítahan nu ndó caja ndó ña núu, ña xíca ini ndó caja ndó. ¹³Jáchi tá ndinuhu ini ndó caja ndó ña núu, ña xíca ini ndó já queá ndítahan nu ndó cuhun ndó indayá. Joo tá xihin ndée ínimá yíi Ndióxi jándihi ndó sahá ña núu xíca ini ndó caja ndó já queá vaxi quívi cuhun ndó coo ndó xihin mé á anda ama cáa quívi.

¹⁴Ndá na nandiquiahva mé ndáha ínimá yíi Ndióxi ña ná candaca a na, mé a ndaa táhyí cúú ná

jahyi Ndióxi. ¹⁵ Nasahan Ndióxi ínimá yii mé á nu ndo joo coó nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínimá yii mé á nu ndo jáchi xihín ña yóho ndája Ndióxi ndohó jahyi mé á ta saha mé ínimá yii yóho cáhan yó xihín Ndióxi ta cáchi yo: “Tátá maní i.” ¹⁶ Ta cáchi ínimá yii Ndióxi xihín ínimá yo ña mé a ndaa cúu yó jahyi Ndióxi. ¹⁷ Ta sahá ña cúu yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihín Jesucristo. Tá ta mé a ndaa táhyí ndoho iní xihín á já quéa tá nandihí cohó coo í xihín mé á indiví ta cán ndicáhnu í xihín á.

¹⁸ Coó a caja toho a tá ná ndoho ini í ñuyívi yóho jáchi vaxi quiví ndicáhnu ndivaha í xihín Jesucristo caja Ndióxi. ¹⁹ Tóco ndihí ña nacavaha mé á ndátí ndihí a ta ndiáva íní a ña ná tandaa quíi quiví cachi Ndióxi ndá ñayivi cúu cuéntá mé á. ²⁰ Nacaja Ndióxi ña ná ndoho ini tóco ndihí ña nacavaha mé á. Mé ñaha nacavaha Ndióxi co cúni a ndoho ini a joo sácú ini Ndióxi ña ná ndoho ini tóco ndihí ña nacavaha mé á. Ta ndátí tiahva ndihí ñaha ²¹ anda tandaa quiví caja Ndióxi ña janí ña já ná a cácomí ga cuachi cuéntá sahá já ná a tívi ga ña. Ta ñúchí ndivaha mé quiví já tá cajii ini tóco ndihí ñaha nacavaha Ndióxi xihín tóco ndihí na cúu jahyi mé á. Jáchi a cácomí ga cuachi cuéntá saha ná. ²² Sa xíni yo ña janda sanahá ndivaha ta anda viti tána ndivaha tóco ndihí ña nacavaha Ndióxi ta ndóho ndivaha ini a tátuhun ndóho ini in ñáñáha tá ndúcú ndéé ña cacu jahyi ña. ²³ Ta quiahva já ndóho ri ini mí ví. Ínimá yii Ndióxi cúu

ñā sāhan tiaḥva mé á nu yō já ná candaā iní ndá quiahva ín ñā quiahva mé á nu yō chága chí nuu. Ta tána ndivaha í anda quiahva ná yaha ñā ndóho iní. Ta ndátí tандаa quivi ndaja Ndióxi tóco ndihi mí ná nduú jahyi mé á já ná ndiquehé yiquí cuñu saá. ²⁴ Najácaacu Ndióxi mí jáchi nacandee iní mé á vatí coó naxiní ñā nacachi mé á quiahva nu yō. Tá xíní cáxí yō in ñaha já candaā iní ñā co xíní ñúhú toho candatí quehé ñā jáchi co xíní ñúhú candatí ñaha cómí yō. ²⁵ Joo tá ná candatí in ñaha ñā co xíní yō já quéa co ndíhi iní nani ndátí ñā.

²⁶ Tá cávitá iní já chindeé ínima yii Ndióxi mí jáchi co tiaḥva í ndaja caça tahví yō nu Ndióxi tá quiahva ndítahan caça tahví yó nu á. Joo sa mé ínima yii Ndióxi yóho tána ta cáhan xihín tuhun ñā a cuú cahan yō. Já caja mé á tá xíca tahví a nu Ndióxi saha yō. ²⁷ Ta sa xíní Ndióxi ñā cáhvi iní ta sa xíní a ñā xíca tahví ínima yii mé á saha yō. Ñā cúni Ndióxi caja saha yō ñā jan quéa xíca tahví ínima yii mé á saha yō, na cúu ñayivi cuéntá mé á.

*Ni in ñaha a cúu cahnu a mí tá cándee iní Jesu-
cristo*

²⁸ Ta sa xíní yō ñā tóco ndihi ñā ndóho í ndaja Ndióxi ñā ná nduu a ñā vaha tá quihvi iní mé á. Jáchi mí cúu yó na sa nasacu ini Ndióxi ñā ná caja í ñā cúni mé á.

²⁹ Ndá ñayivi naçaxi Ndióxi anda saha naçaxi a na ñā ná nduu na tátuhun Jesucristo, mé á cúu jahyi Ndióxi. Jáchi cúni Ndióxi ñā ná nduu Jesu-
cristo jiní nuú ndihi na cúu cuéntá mé á. ³⁰ Ta naçana Ndióxi na naçaxi a ñā ná candee ini na mé á. Ta naçaja mé á ñā ná nduu ndaa na nu á. Ta vaxi

quiví caja mé á ña ná ndináhnu ndihi na cán xihín á.

³¹ Ndiá cachí sahá ña yóho. Ni in túhún ñaha a cúu cani táhan xohó ta ni a cúu quee vaha xohó jáchi cuahan Ndióxi xoo í. ³² Ta coó nacajíhnda Ndióxi jahyi a jáchi nandiquiahva Ndióxi Jesucristo, jahyi a ña ná quivi a saha yo. Xihín ña yóho cándaá iní ña co ndáhví cúu ini a quiahva tóco ndihi ñaha nu yo.

³³ Yo já cuu chícaan cuachi jatá na nacaxi Ndióxi. Ni in ñayivi a cúu chícaan cuachi jatá na jáchi sa mé Ndióxi nandaja mé á na ñayivi ndaa nu á. ³⁴ Yo já cuu jácojo cuachi jatá na cúu cuéntá mé á. Ni in ñayivi jáchi naxihí Jesucristo saha yo. Nanditacu tucu a ta ín coo a xoo cuáha Ndióxi indiví xíca tahví a nu Ndióxi saha yo. ³⁵ Yo já cuu caji nuu nu Jesucristo quíhvi ini a mí. Ni in ñaha a cúu caja ña jándacoo Jesucristo ña quíhvi ini a mí. Vatí ná ndoho ndivaha iní ta vatí ná quixi ña yíhví yo ta vatí ná ndicuíta na caja xíxi na xohó ta vatí ná quixi joco ta vatí janda jáhma yo ná ndimaní ta vatí tondóhó vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quíhvi ini a mí. ³⁶ Já cáchí tuhun Ndióxi já:

Saha Ndióxi sácú ini ñayivi cahní na ndehe ndijáá ní quiví.

Tá quiahva cája na xihín ndicachi, rí cuhun quivi quiahva já cája na xihín nde, cáchí tuhun Ndióxi.

³⁷ Vatí ndóho í tóco ndihi ña yóho joo quee vaha tá quee vaha í caja Jesucristo jáchi quíhvi ini a mí.

³⁸ Sa xíní vaha í ña ni in ñaha a cúu caja tavá mí ndáha Jesucristo, mé a quíhvi ini mí. Ta coó a caja toho a á tácu yo á sa naxihí yo. Ni tátó Ndióxi ni

ñá sáhndá chuun nuú ñayivi ta ni ñá ndóho iní viti ni ñá ndoho iní chí nuu ³⁹ ta ni in ñaha ín indivi ta ni in ñaha ín tixi ñúhu ta ni in ñaha ñacavaha Ndióxi a cuú tavá mí ndáha Ndióxi, mé a quíhvi ini mí. Ta najánaha Jesucristo, xitoho í nu yo ña quíhvi ndivaha ini Ndióxi mí.

9

Ñayivi naquixi chichi Israel cúu na ñacaxi Ndióxi

¹ Ña ndaa cúu ña cáhan i xihín ndó viti ta co cávaha i ña tuhún jáchi cúu u cuéntá Jesucristo. Sáhndá ínima yí Ndióxi chuun nu xíní túní i sahá ña cán quea co cáhan i ña tuhún. ² Ín cuéha ndivaha ini i ta já táhvi ndivaha ini i sahá na Israel. ³ Mé a ndaa cúni yehe chindeé e na ñaquixi chichi nuú ñaquixi mí i ña ná candeé ini na Jesucristo. Ta janda ín tiahva i cacuu u da chícáan na cháhan jata tá ta xihín ña yóho cuu cacu ndaa ínima ná. Joo a cuú caja i ña. ⁴ Mé na cán ñaquixi na chichi Israel ta ñacaxi Ndióxi na já ná nduu na ñayivi cuéntá mé á. Najánaha Ndióxi nu ná ndá quíahva cáhnu cúu mé á. Ta ñasahan tuhun a nu ná ña ñasacu ini a caja saha ná. Ñasahan Ndióxi ley Moisés nu ná ta najánaha mé á na ndaja ndítahan nu ná caja cáhnu na mé á. Ñacaxi tuhun a xihín ná sahá ñamaní caja mé á xihín ná chí nuu. ⁵ Ta ñayivi Israel ñaquixi na chichi na ñasanduu sanahá. Ta ñacacu Jesucristo chichi mé na cán ta ñanduu a in ñayivi. Chí anda ama cáa quívi ná caja cáhnu yó Jesucristo, mé á cúu Ndióxi, mé á cómi cuéntá saha tóco ndihi ñaha. Já ná coo.

⁶ A juú cáhán ndo ña coo najáxinu Ndióxi tuhun a ñasahan nuú na Israel. A juú ndihi ñayivi jan

cúu n̄a cuéntá Ndióxi vatí naquixi na chichi Israel. ⁷ A juú tóco ndihi na naquixi chichi Abraham cúu ná cuéntá Ndióxi jáchi janda saha nacachi Ndióxi xihin dá: “Ñayivi cuaha quixi chichún cacuu na jahyi Isaac”, cáchi a xihin Abraham. ⁸ Ña yóho cún̄i cachi a ña ni in túhún ñayivi co cúu ná jahyi Ndióxi sahá ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxinu coo Ndióxi tuhun nasahan nu Abraham. ⁹ Sanahá ndivaha nasahan Ndióxi tuhun a nu Abraham já cáchi a já: “Xinu cuja já quixi tucu u ta cacu jahyi ta ñájíhún, Sara.”

¹⁰ Candehé ndo ná ndicani i nu ndo ña nayaha chága chinu. Isaac, da cúu tásáhn̄u jícó yo nasacuu da tátá ndíví ta valí jahyi Rebeca. ¹¹ Tá cáman̄i cacu ta cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví ta valí ni ña vaha ni ña núu. Já nasacu ini a caja ¹² ta já nacachi a xihin Rebeca: “Jahyún, da cacu chí ivi cahnda chuun nuú da cacu nu cuítí.” ¹³ Ta já cáchi tucu tuhun Ndióxi já sahá jahyi Rebeca: “Nacaxi i Jacobo, da nacacu chí ivi caja i ñaman̄i xihin dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

¹⁴ Ama ná cachi rí ña co cája ndaa Ndióxi. A cáchi toho í já. ¹⁵ Já nacachi Ndióxi xihin Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, nacachi Ndióxi sanahá. ¹⁶ Ña cán queá co cája Ndióxi ña cún̄i ñayivi ta a cúu caja ndúsa ñayivi xihin á ña ná tahnda ini a saha ná jáchi táhnda ini a sahá ñayivi, na cún̄i mé á tahnda

ini a saha. ¹⁷ Já cáchí tuhun Ndióxi já xihín da cúu rey nuú nación Egipto: “Nandaja i yohó rey jáchi cúni jánaḥa i nuun ña cuu cája i tóco ndihi ñaha tá cúni já ná candaḥa ini tóco ndihi ñayivi ndúu ñuyívi ña cáhnu ndivaha cúu yehe”, naçachi Ndióxi. ¹⁸ Ña cán quéa tá cúni Ndióxi taḥnda ini a sahá ñayivi já cuu taḥnda ini a saha ná. Ta tá cúni a ndaja táhyi a ínimá ná já cuu ndaja táhyi a ña.

¹⁹ Joo a cúu cachí ña co cája ndaa Ndióxi tá cáchí a ña cómi yo cuachi. Vatí sácú ini Ndióxi ña caja in in ñayivi joo co chíndahá a na caja na cuachi. ²⁰ Co ndítahan nuú ñayivi ndaja ndichí na Ndióxi sahá ña cája mé á. Jáchi sa xíni yo ña co ndítahan nuú in quiji cachi a xihín da cávaḥa ñaha: “Co cátóo i coo i tá quiaḥva naçavaḥa ndó yehe.” ²¹ A cúu cachi quiji cán já jáchi mé da cávaḥa quiji cán, cávaḥa da ña tá quiaḥva cúni mé dá. Xihín in mbohla loho ñuhú quiji cuu cávaḥa da in quiji cacuu a javí á in quiji cuénta yávi núhu.

²² Ta quiaḥva já cája Ndióxi xihín ñayivi. Ín tiaḥva mé á jánaḥa nu ná ña xójo ndivaha ini a sahá cuachi na. Ta ín tiaḥva mé á jánaḥa nu ná ña cuu caja mé á tóco ndihi ñaha. Joo naçaja ndeé ini Ndióxi ta naṣandati a jándoho a ini ñayivi vatí nandítahan nu ná ndoho ini na sahá cuachi na. ²³ Mé a ndaa táhnda ini Ndióxi sahá ñayivi ta cúni a jánaḥa nu ná ña cáhnu ndivaha cúu mé á ta cúni a jánaḥa nu ná ndá quiaḥva quíhvi ini a na. Anda sanahá ndivaha sácú ini a jánaḥa nu yo ndá quiaḥva cáhnu cacuu yó nu mé á. ²⁴ Naçaxi a ñayivi tañu na naquixi chichi Israel ta naçaxi mé á ñayivi tañu na coó naquixi chichi Israel. Ta mí cúu yó

na ñacaxi a. ²⁵ Já ñacachi Ndióxi já sanahá ta já ñacahyi Oseas ini tuhun Ndióxi:

Tandaa quivi caxi yehe ñayivi, na co cúu cuénta mí i ta ndaja i na cuénta mí i.

Ta na coo ñaquihvi ini i jihna quihvi ini i na viti.

²⁶ Ta sa mé nu nduu ñayivi, na coo ñasacuu cuénta Ndióxi,

cán cuhun mé á caxi a na ta caja ña ná nduu na cuénta mé á jáchi cúu á in Ndióxi tácu, já cáchi tuhun mé á.

²⁷ Ta sahá na ñaqui chichi Israel já ñacachi Isaías: “Vati ndicua há ñayivi Israel tá quiahva cuahá ñutí yuhú tañuhú joo chá va cacuu na cacu ndaa inima. ²⁸ Jáchi jonáa va jáxinu coo Ndióxi tuhun a ta anda jávi caja vii a saha tóco ndihi ñayivi nduu ñuyivi”, ñacachi Isaías. ²⁹ Ta já ñacachi tucu Isaías já sanahá:

Tá quiahva ñacaja Ndióxi najándihi a sahá ñayivi ñuu Sodoma xihín ñuu Gomorra quiahva já caja Ndióxi jándihi a saha yo, nduu.

Joo sahá ña natahvi ini Ndióxi sahá na Israel sahá ña cán quea coo najándihi a saha ná, já cáchi tuhun Ndióxi.

Ndítahan nuú na Israel candeé ini na Jesucristo

³⁰ Ña cán quea ndícani i nu ndo sahá ñayivi, na coo ñaqui chichi Israel. Co ndínducú na nduu ndaa na nu Ndióxi joo tá ñacasahá na candeé ini na Jesucristo já ñacaja Ndióxi ña ná nduu ndaa na nu mé á. ³¹ Joo ñayivi Israel cája na ña sáhdá ley Moisés xihín ndinuhu ini na jáchi cáhán na cuu nduu ndaa na nu Ndióxi sahá ña sácú vaha na ley Moisés. Joo coo ñacuu nduu ndaa na nu

Ndióxi xihín ña yóho. ³² Já nandoho na Israel jáchi nanditahan nu ná candeé ini na Jesucristo. Xihín ndinuhu ini na cája na ña cáchí ley joo coo ñacuu nduu ndaa na nu Ndióxi xihín ñaha cája na. Ña cán quéa cúu ná tátuhun in na ñacachihin saha xihín yuu cáhnu. ³³ Jáchi cáchí tuhun Ndióxi ña cúu Jesucristo tátuhun yuu cáhnu nu cáchihin sahá ñayivi. Já cáchí tuhun Ndióxi já:

Nasacu yehe in yuu tóto cáhnu ñuu Sión ta xihín yuu cáhnu cán cuaha ná cachihin saha.

Joo ndá na ná candeé ini mé a ñachindahá i, na cán cúu ná na a cácahan nuu, já ñacachi tuhun Ndióxi.

10

¹ Cuni johó vaha ndó, ñani i, na cúu cuéntá Jesús. Jáchi ndinuhu ini i xica tahví i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuu cuachi na. ² Mé a ndaa ná cahan i xihin ndo ña cája cáhnu na Israel Ndióxi xihín ndinuhu ini na joo co cándaa cáxi ini na ña cúni Ndióxi caja na. ³ Jáchi co xini na ndaja cája Ndióxi ña ná nduu ndaa ñayivi nu mé á sahá ña cán quéa ndúcú na nduu ndaa na nu mé á xihín ña cája mé va na. Ta co cúni na ndiquiahva na mé ná ndáha Ndióxi ña ná caja na ña nasacu ini mé á caja na. ⁴ Co xini na ña ña ñaquixi Jesucristo ta ñaxihi a saha yo já najáxinu coo a caja ña cáchí ley ña ná nduu ndaa tóco ndihi na candeé ini mé á.

⁵ Sañahá ndivaha ñacahyí Moisés sahá ñayivi, na cúni nduu ndaa nu Ndióxi xihin ley Moisés. Já cáchí a já: “Ndá na co cómi cuachi nu Ndióxi, na cán cuu nduu ndaa nu mé á ta jácacu a na”, já ñacahyí

da. ⁶ Joo tá ná jácacu Ndióxi mí sahá ña cándéé ini mé á já quéa co xíní ñúhú cūhun yo indivi jánuu í Jesucristo ña ná nuu a chindeé a mí jáchi sa ñajaja mé á ña. ⁷ Ta co xíní ñúhú cūhun yo nu ndúu ínima ndii ña ná ndiquehé Jesucristo tañu na sa ñaxihi jáchi mé Jesucristo sa nanditacu tucu a. ⁸ Co xíní ñúhú cūhun xíca ñahá yo ndinducú yo Jesucristo jáchi ín yati ndivaha mé á nu yo jáchi ín a xoho. Ta mé tūhun cáhan nde yóho cúú á tūhun cáhan saha Jesucristo já ná cándéé ini ndó mé á. ⁹ Ta tá cachún ña cúú Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na ñaxihi já quéa cuu cacu ndaa ínimun. ¹⁰ Jáchi tá cándéé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáhan na xihín java ga ñayivi ña cándéé ini na mé á já quéa cuu cacu ndaa ínima ná.

¹¹ Já cáchi tūhun Ndióxi já: “Ndá na ná cándéé ini Jesús a xínu toho quivi cáhan na ña najándahvi Ndióxi na.” ¹² In cúú tóco ndihi ñayivi nu Ndióxi. Tá quiahva jácacu Ndióxi na ñaqui xi chichí Israel quiahva já jácacu a na co ñaqui xi chichí Israel. Jáchi sa mé Ndióxi cán cúú Ndióxi nu tóco ndihi ñayivi ta co ndáhví cúu ini a quiahva ñaha nuú na xíca tahví nu mé á. ¹³ Já cáchi tūhun Ndióxi: “Ndá na ná cacá tahví nu Ndióxi ña ná chindeé a na, na cán cacu ndaa ínima.” ¹⁴ Ta ndaja caja na cacá tahví na nu Jesús tá ta cámani cándéé ini na mé á. Ta ndaja caja na cándéé ini na mé á tá a ñaha cuni johu na tūhun vaha cáhan saha Jesús. Ta ndaja caja na cuni johu na tūhun vaha saha Jesús tá cámani cūhun in na caxi tūhun na ña nu ná. ¹⁵ Ta ndaja caja na cūhun na cáhan na tūhun Ndióxi

xihin ná tá ta co in in na chindahá na cuhun na. Já cáchí tuhun Ndióxi já: “Ndaja ñúchí chá tá xínu coo na ñéhe tuhun vaha saha Ndióxi ña ná coo vaha í xihin mé á.”

¹⁶ Joo a juú ndihi ñayivi cándúsa tuhun Ndióxi. Ña yóho cúú á tá quiahva nacachi Isaías: “Ndióxi, mé ndó cúú ndó xitoho nde. Chá cuití ñayivi cándúsa tuhun nacahan nde xihin ná.” ¹⁷ Jáchi jihna ñúhú cáhan na tuhun vaha saha Jesucristo nuú ñayivi ta xihín ña xíni johó na cán jáxínu ini na xihín á. Anda jáví cásáhá na cándeé ini na mé á ta cája na ña cúni a.

¹⁸ Á sa naxini johó na tuhun vaha cáhan saha Jesús. Ajan. Sa naxini johó na ña. Jáchi já cáchí tuhun Ndióxi já:

Nasahan na cahan na tuhun Ndióxi nuú ñayivi, ta níí cúú sahá ñuyíví naxínu tuhun cáhan na, já cáchí tuhun Ndióxi.

¹⁹ Á nacandaa ini ñayivi Israel ña yóho. Ajan. Cándaa vaha ini ná ña. Jáchi já nacahyí Moisés sanahá:

Ndióxi quéa nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cája i ña ná candúsa mé na tóho cán yehe, nacachi tuhun Ndióxi.

²⁰ Xihín ña yóho nasahan ndeé ini Isaías cahyí da ña nacachi Ndióxi tá nacachi a já:

Mé na co ndínducú yehe, na cán cúú na nandiñehé yehe.

Ta najánaḥa i mí i nu ná vatí coó nandaca tuhun na sahá i, nacachi tuhun Ndióxi.

21 Joo já ñacachi Ndióxi sahá ñayivi Israel: “Níí tiempo cúni ndiquehe vaha i ñayivi Israel joo co cúni na quixi na nuú i jáchi sáa ini na ta co cúni na caja na ña cúni”, ñacachi tuhun Ndióxi.

11

Cája Ndióxi ñamaní xihín ñayivi Israel

¹ Ta viti ná ndaca tuhún i ndohó ña yóho: Á cáhán ndo ña najándacoo ndáha Ndióxi ñayivi Israel. A juú ña ndaa cúu á jáchi sa mé yehe cúu u da Israel, da ñaquixi chichi Abraham ta ñaquixi i chichi Benjamín, da ñasacuu jahyi ñání jícó Abraham. ² Janda mé saha ñacachi Ndióxi ña ñacaxi mé á na Israel cacuu na cuénta mé á ta co cándají a na viti. Sa xini ndó ña ñacachi tuhun Ndióxi sahá da ñasacuu profeta Elías. Mé da yóho tá naxica tahví da nu Ndióxi já najácho da cuachi jatá na Israel. ³ Já ñacachi da já: “Cándehe ndo Ndióxi, xitoho i. Sa ñasahní na profeta cuénta mé ndó ta nandicani na nu náa ndo. Ta viti nú laa in tuhún yehe cuití va cája ña sáhdá ndo. Ta ndúcú na cahní na yehe”, já ñacachi Elías xihin Ndióxi. ⁴ Ta já ñacachi Ndióxi xihin dá: “A juú in talaá yóho cája ña cúni jáchi ndúu yii va usa mil ta cája ña cúni ta coo ñacaxítí na nuú tiniñu yúu Baal”, ñacachi Ndióxi xihin dá. ⁵ Quiahva já lín a viti. Ndúu chá na cája ña cúni Ndióxi jáchi ñacaja Ndióxi ñamaní xihin ná ta ñasacu ini a jácacu a na. ⁶ Ñacaxi Ndióxi na jáchi ñatahví ini a saha ná. Coo ñasacuu a sahá ña ñacaja na jáchi tá ná cacuu a sahá ña cája na já co cúu ga ñamaní Ndióxi ta ña yóho cúu ña cúni Ndióxi caja.

⁷ Ña cán quéa cuahá ndivaha ñayivi Israel cóo nanduu ndaa na nu Ndióxi sahá ña nacaja na jáchi nandaja táhyí na ínimá ná. Joo na nacaxi Ndióxi, na cán cúu na nanduu ndaa nu mé á. ⁸ Já cáhí tuhun Ndióxi já: “Cò cúni na candúsa na Ndióxi sahá ña cán quéa nasaji Ndióxi xíní túní ná chí in ndeé. Ta quiahva já ndáa na janda víti jáchi cò cándaá ini na ña cáhan Ndióxi xihin ná.” ⁹ Já nacahyí David sanahá:

Ná cahán na ña cuahan vaha na ichí Ndióxi sahá cuahá ñaha cómi na,
ta ná ndoho ini na sahá cuachi cája na.

¹⁰ Ta ná cuaá na já ná a cúni na,
ta ná nditojo jata ná níi tiempo sahá ña veé ndójo na, nacachi David.

Jáçacu Ndióxi na cóo naquixi chichi Israel

¹¹ Ta viti ná ndaca tuhún i ndohó ña yóho: Á cáhán ndo ña a cuú cacu ndaa ínimá na Israel. A juú ña ndaa cúu á. Jáchi vatí sáá ini na Israel ta vatí cò cúni na candeé ini na Jesús joo xihín ña nacaja na yóho nanuna nuú na tóho cuni johó na tuhun vaha saha Jesús ta já cuu cacu ndaa ínimá ná nu mé á. Ta sahá ña yóho casahá na Israel cahihvi ini na xihín na tóho. ¹² Nacaja Ndióxi cuahá ñamani xihin tóco ndihi na tóho jáchi nacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuaha chága ñamani caja Ndióxi xihin tóco ndihí tá ná xinu quivi ndiquehe na Israel íchi cuéntá mé á.

¹³ Joo ín in ñaha ña cúni cahán i xihin ndo, na tóho. Ndióxi quéa nachindahá yehe tañu ndóhó, na cóo naquixi chichi Israel ta chuun cáhnu ndivaha

quéa ndójo i xíní i. ¹⁴ Jáchí ña cúní mí i quéa ná cahihvi ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínima na Israel nu Ndióxi jáchi mé ná cúú ná chichi nuú naquixi mí i. ¹⁵ Nasacu xóo tóo Ndióxi na naquixi chichi Israel jáchi nasacu ini a jándique táhan mání á tóco ndihi ñayivi ndúu ñuyívi xihín mé á. Ta tá ná xinu quivi casáhá na Israel ndiquehe na tuhun Ndióxi cacuu a in ñaha ñúchí ndivaha. Cacuu a tátuhun casáhá nditacu tucu na jáchi viti cúú ná tátuhun na naxihí jáchi cóo naxeén na ndiquehe na tuhun Ndióxi. ¹⁶ Abraham nasacuu da cuéntá Ndióxi ña cán quéa jahyi da, na nacacu chichi da cúú ná ñayivi cuéntá Ndióxi. Abraham, da cúú cuéntá mé á cúú dá tátuhun yóho in yitó olivo. Ta ñayivi nacacu chichi da cúú ná cuéntá mé á ta cúú ná tátuhun ndáha mé yitó olivo cán.

¹⁷ Cúú á tátuhun nasahnda Ndióxi java ndáha, dó vaha ta nachitivi ndaa mé á ndáha yitó olivo yúcu mé nuú nasahin ndáha cán. Ta viti quiahva dó ndée nu ndáha yitó olivo yúcu cán ña ná catacu dó. Quiahva já nacaja Ndióxi nasacu xóo a na Israel ta nacaja mé á ñamani xihín mé ndó, na tóho já ná nduu ndó cuéntá mé á. Ta viti cája Ndióxi cuahá ñamani xihín ndo tá quiahva cája xihín na Israel. ¹⁸ Joo ndóhó, na cúú na tóho a cáhan ndo ña vaha chága mé ndó a juú ga na Israel. Co ndítahan cahán ndo já. Co cúú ndó tátuhun yohó yító jáchi cúú ndó tátuhun ndáha do. Ta tá co yóho dá já quéa a cúu catacu ndáha do. Sahá ña cán quéa co ndítahan caha cáhnu ndó mé ndó.

¹⁹ A váha cahvi ini ndó ña náhnu chága mé ndó

nu Ndióxi a juú ga na Israel sahá ña nasacu xóo mé á na Israel ta nasuná a íchi nu ndóhó candeé ini ndó mé á. ²⁰ Cándehé ndo. Nasacu xóo Ndióxi na Israel sahá ña coó nacandeé ini na mé á ta nandacaxi a ndóhó sahá ña candeé ini ndó mé á ña cán quéa co ndítahan caja cáhnu ndó mé ndó. Ña ndítahan caja ndó quéa cayihví ndo Ndióxi. ²¹ Xíni ñúhú ndicuhun ini ndó ña cuu jácaxoo tucu Ndióxi ndohó. Coó natahnda ini a jándacoo xóo a na Israel, mé na nacaxi á. Sahá ña cán quéa cachí ga ví mé ndó, na tóho ndáa náha caja Ndióxi cacu xóo tucu a ndohó. ²² Cándehé ndo jáchi táhvi ini Ndióxi sahá ñayivi tá candeé ini na mé á joo cuehe ndivaha mé á xihín na sáa ini. Ña cán quéa tá co candeé ini ndó mé á ta ni co quíhvi ini ndó a já cacu xóo a ndohó tá quiahva nacaja xihín na Israel. ²³ Joo tá ná ndihvi na Israel íchi Ndióxi candeé ini na mé á já quéa ndiquehe tucu Ndióxi na jáchi cuu caja mé á tóco ndihi náha. ²⁴ Nandiquehe Ndióxi ndohó vatí nasanduu xíca ndó nu á ta nandaja mé á ndohó cuéntá mé á vatí cúu ndó na tóho. Mé ndó cúu ndó tátuhun ndáha yitó olivo, dó yúcú, dó nachativi ndaa Ndióxi tóco dó vaha. Ta ña yóho quéa a cúu coo já, nduu. Joo nacaja Ndióxi já xihín ndo. Ta ndáa náha cuu caja tucu Ndióxi xihín na Israel ña ndiquehe tucu a na ta cacu tucu a na nu ndahá yíto olivo, dó vaha nuú nasandaa na jihna.

Vaxi quivi tá candeé ini na Israel Jesús

²⁵ Ñani mí i, na cúu cuéntá Jesús. Cúni ña ná candaa ini ndó ña nasacu ini Ndióxi caja chága chí nuu já ná a cája cáhnu ndó mé ndó. Cuahá na Israel nandaja táhyí na ínimá ná ta co cúni na ndiquehe

na tuhun Ndióxi. Joo tá sa nandiquehe ndihi na tóho, na nasacu ini Ndióxi jácaacu a anda jáví casáhá na Israel ndiquehe na tuhun Ndióxi. ²⁶ Anda jáví cacu ndaa ínimá ndihi na Israel. Ta já cáchí tuhun Ndióxi sahá ña yóho:

Ñuu Sión quixi in da jácaacu ñayivi Israel,
na naquixi chichi Jacob ná a cája ga na cuachi.

²⁷ Ta jándoo i cuachi nacaja na,
tá quiahva nacachi i xihin ná caja i, cáchí Ndióxi.

²⁸ Tiempo viti cuahá ndivaha na Israel co cúní na tuhun vaha saha Jesús sahá ña cán quéa co cúní na Ndióxi. Joo cája na ña yóho ña ná núná nu ndóhó, na tóho já ná cuu candeé ini ndó Ndióxi. Vatí cája na Israel ña yóho joo quíhvi ini tá quíhvi ini Ndióxi na sahá tuhun nasahan nu tásáhnú jícó na. ²⁹ Tá sahan Ndióxi ña cáchí a quiahva nu yo já quéa co ndímaní mé á nuú tuhun a ta co ndícó coo a cándaa ña sahan nu yo. Ta ni co ndícó coo ini a tá sa nandacaxi a mí. ³⁰ Sáa nasahjin ini ndóhó, na tóho sanahá joo viti nacaja mé á cuahá ñamaní xihin ndó sahá ña sáa ini na Israel. ³¹ Ta vatí sáa ini na Israel viti joo xihin ña yóho núná nu ndóhó, na tóho ndiquehe ndó ñamaní Ndióxi. Joo vaxi quívi tá tahvi ini Ndióxi sahá na Israel tá quiahva natahvi ini a saha ndóhó, na tóho. ³² Nachicaji Ndióxi xíní túní na Israel xihin na tóho ña ná nduu na na sáa ini. Nacaja Ndióxi ña yóho já ná cuu tahvi in nuú ini a saha tóco ndihi ñayivi.

³³ Cáhnu ndivaha cúú tóco ndihi ñaha Ndióxi. Ndíchí ndivaha jiní mé á ta cándaa ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú cándaa ini ña cája Ndióxi.

³⁴ Já cáchí tuhun Ndióxi já: “Ni in ñayivi a cuú

candaa ini na ña cáhvi ini Ndióxi. Ta ni in ñayivi a cuú jácahan na mé á caja ña ndítahan caja. ³⁵ Coó ñayivi cája ñamani xihin Ndióxi ña ná ndaca na ña nu mé á”, cáhí tuhun Ndióxi. ³⁶ Jáchi Ndióxi quea nacavaha tóco ndihi ñaha ta ndúu a saha mé á ta ndúu a cuéntá mé á. Anda ama cáa quivi ná caja cáhnu í Ndióxi. Já ná coo.

12

Tácu yo caja chúun í cuéntá Ndióxi

¹ Natahvi ini Ndióxi saha ndó, ñani mí i, na cuú cuéntá Jesús. Saha ña cán quea xica tahví i nu ndo ña ná ndiquiahva ndó mé ndó ndáha Ndióxi já ná cacuu a táhuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyí cája cáhnu ndó Ndióxi ta ña yóho cuú á ña ndítahan nu ndó caja ndó. ² A cája ga ndó ña núu ña cája ñayivi ñuyívi. Quiahva ndó ñamani nu Ndióxi ña ná ndaja víi a xini túni ndo. Anda jáví candaa ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

³ Nacaja Ndióxi ñamani xihín i tá nacaxi a yehe. Ña cán quea cáhan i xihin ndihi ndó ña co ndítahan cahán ndo ña cuú ndó na náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quea coto ndojó ndo mé ndó jáchi nasacu ini Ndióxi ña ná candeé ini ndó mé á já ná cuu caja ndó ña cúni a. ⁴ Candehe ndó tá quiahva iin yiquí cuñu í. In túhún cuú yiquí cuñu í joo cuahá nuú ñaha ndáca ta sa jín sa jín chuun cája in in ña ndáca

yiquí cuñu í. ⁵ Quiahva já iin tóco ndihí, na cúu cuéntá Jesús. Sa jíin sa jíin chuun cája in in í joo in va cúu yo xihín Jesucristo. Ta sa jíin sa jíin chuun cája in in í.

⁶ Sa jíin sa jíin chuun nasahan Ndióxi nuú in in í caja í ta mé á nasacu ini a ndá chuun queá quiahva nuú in in í. Sahá ña cán queá tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi cándeé ini ndó a. ⁷ Ta tá nasahan Ndióxi chuun nu ndó ña ná chindeé ndó ñayivi já queá ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já queá ndítahan nu ndó jánaha vaha ndó na. ⁸ Tá ta nasacu Ndióxi ini ínima ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jása ndo nuú ñayivi xíní ñúhú cajji ini ndó jása ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajji ini ndó chindeé ndó na.

Ña ndítahan caja na cúu cuéntá Jesús

⁹ Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó. ¹⁰ Xíní ñúhú quihvi ini ndó na cúu cuéntá Jesús jáchi cúu ná tátuhun na vehe ndó ta cajji ini ndó tá caja cáhnu táhan ndó.

¹¹ Nducú ndée ndo ta a cácuu ndó na jusá ta xihín ndinuhu ini ndó caja chúun ndó cuéntá Ndióxi, xitoho í.

¹² Xíní ñúhú cajji ini ndó candatí ndó xinu coo tuhun nasahan Ndióxi nu ndo. Quiahva ndeé

vaha ini ndó tá ndóho ini ndó ta a jándacoo ndó ña caça tahví ndo nu Ndióxi.

¹³ Ndá ñaha ndímani nuú java ga na cúu cuéntá Jesús ná chindeé ndó na. Ta ndiquehe vaha ndó ñayivi xító nihni ndohó.

¹⁴ Caça tahví ndo nu Ndióxi sahá na cája xíxi xihín ndo ña ná caja Ndióxi ñamani xihín ná. Caça tahví ndo nu Ndióxi saha ná ta a chícaan ndó cháhan jata ná.

¹⁵ Cajii ini ndó xihín na cájii ini ta cuacu ndó xihín na sácu.

¹⁶ In nuú quihvi ini táhan ndó. A cája ichi ini ndó. Ña ndítahan caja ndó queá jánuu ndáha ndó mé ndó xihín ñayivi ndáhvi, na co ndíñehe jíco mé. Ta a cáhan ndo ña cúu ndó na ndíchí ndivaha.

¹⁷ Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo.

¹⁸ A ndúcú ndo cani táhan ndó xihín ñayivi ta ndihí ini ndó coo vaha ndó xihín ndihi na. ¹⁹ Ñani mí i, na cúu cuéntá Jesús. Tá cája xíxi na xihín ndo a ndúcú ñehe toho ndó ña núu nu ná jáchi cojo ini Ndióxi xihín na cája já ta ndítahan nu mé á jándoho a ini na. Já cáchi tuhun Ndióxi: “Yehe ndítahan nuú jándoho i ini ñayivi, na cája ña núu”, cáchi Ndióxi.

²⁰ Vaha chága ná caja ndó ña cáchi tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuí nu ná coho na. Tá ná caja ndó ña yóho já queá cacahan nuú na cán sahá ña núu cája na xihín ndó.” ²¹ A quiahva ndó ñamani quee vaha ña quini

xihin ndó. Ña ndítahan caja ndó quea caja ndó ña vaha já ná cuu quee vaha ndó cahnu ndó ña quini.

13

¹ Xíni ñúhú coo johó ndó nuú ña cáhan na jutixia xihin ndó. Jáchi sáhan Ndióxi ñamani nuú na cán cahnda na chuun nuú ñayivi. Ta mé Ndióxi quea nasacu a na. ² Ta ndá na co cuni cuni johó nuú sáhdá na jutixia cúu ná na sáji nuu nu Ndióxi jáchi Ndióxi quea nasacu a na cán. Ta ndá na co cuni caja ña sáhdá na ndoho ini na. ³ Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cuni ndó cayihví ndó na jutixia xíni ñúhú caja ndó ña vaha já ná cajji ini na jutixia xihin ndó. ⁴ Nasacu Ndióxi na jutixia ña ná chindee na ndohó. Joo tá cája ndó ña núu já quea xíni ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu. ⁵ Ña cán quea ndítahan nu ndó caja ndó ña sáhdá na jutixia já ná a jándoho na ini ndó jáchi sa náha mé va xíni túni yo cahán xoho ña xíni ñúhú candúsa í ña sáhdá na jutixia nu yo. ⁶ Sahá ña cán quea chahvi ndó jiuhún cuéntá impuesto jáchi sa xíni ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

⁷ Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na jática ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihin. ⁸ A cáyicá ndó ñaha nuú ni in

ñayivi. Ña ndíyicá ndo quéa quihvi ini táhan ndó. Jáchí ndá na quihvi ini ñayivi, na cán cúu na cája ña sáhdá ley Moisés. ⁹ Jáchí tá quihvi ini ndó ñani táhan ndó já quéa a ndiáva ini ndó caja ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndii. Ta a cáhvi ini ndó caja cuíhná ndo ñaha inga na. Ta ni a ndiáva ini ndó cacomí ndo ñaha cómi inga na. Tá quihvi ini ndó ñani táhan ndó já quéa cúni cachi a ña cája ndó ña sáhdá ley Moisés tá cáhí a já: “Quihvi ini ndó ñani táhan ndó tá quiahva quihvi ini ndó mé ndó.” ¹⁰ Ndá na quihvi ini ñani táhan, na cán cúu na cája vaha xihín ñani táhan na. Ña cán quéa tá quihvi ini ñani táhan í já quéa jáxinu yó nuú ña sáhdá ley Moisés.

¹¹ Saha tóco ndihi ña cáhan í xihín ndo yóho xíní ñúhú candehé ndo ndá quiahva cáa tiempo ndúú viti. Xíní ñúhú ndicáxi vaha ini ndó caja ndó ña cúni Ndióxi jáchi viti sa nacayati chága quivi jácacu Ndióxi mí a juú ga tá jacá nacandúsa í tuhun Ndióxi. ¹² Cúu á tátuhun ja chá cúni yaha ñuú ta casahá tivi yaa. Ña yóho cúni cachi a ña sa nacayati quivi quixi tucu Jesucristo. Ña cán quéa xíní ñúhú jándacoo í ña núu cája í tátuhun cája ñayivi xíca nuu naá. Ta xíní ñúhú caja í ña vaha já quéa quee vaha í xihín ña núu. ¹³ Ndísáhnú ná coo iní caja í tóco ndihi ñaha tátuhun cúu yó na ndúu nu yehe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najihí. Ta a ndúcú yo cani táhan í xihín ñani táhan í ta ni a cáhivvi iní xihín ná. ¹⁴ Ña ndítahan caja í quéa cacá chága yo ndée yo nu

Jesucristo, xitoho í já ná cacuu a tátuhun candixí in jahmá çaa ña sándixi da cáni táhan. Ta coto a quiáhva ndó ñamaní nuú yiquí cuñu ndó caja ña núu.

14

Cō ndítahan candehé ndaa táhan í

¹ Ndiq̄uehe v̄aha ndó n̄a cúu cuéntá Jesús vatí cō cándāa v̄aha ini na ña j̄anāha t̄uhun Ndióxi. Ta a cáni táhan yúhu ndó x̄ih̄in ná sahá ña cándusa na.

² In java na cúu cuéntá Jesús cáhán n̄a ña cuu cuxu na cuñu, ña najoco na nuú yoco. Joo java na cúu cuéntá Jesús, n̄a saá x̄ih̄in t̄uhun Ndióxi cáhán n̄a ña a cúu toho cuxu na cuñu, ña najoco na nuú yoco sahá ña cán quea cō x̄ixi na ña. ³ N̄a x̄ixi mé cuñu cán cō ndítahan nu ná candehé ndaa na n̄a cō x̄ixi ña ta n̄a cō x̄ixi cuñu cán cō ndítahan nu ná candehé ndaa na n̄a x̄ixi ña. Jách̄i ndīquehe v̄aha Ndióxi ndíví n̄a cán vatí sa jíin cáhán n̄a. ⁴ Ta quiáhva já cō ndítahan nu ndó candehé ndaa ndó mozo ñani táhan ndó á cája v̄aha da á cō cája v̄aha da nuú xitoho da. V̄aha ri caja v̄aha da tá v̄aha ri cō cája v̄aha da jách̄i mé va xitoho da cán x̄ini sahá ña cán. Joo cuu caja Ndióxi ña ná candoo v̄aha mozo cán nuú xitoho da.

⁵ Java ñayivi cáchí n̄a ña in quiví náhnu chága nuú java ga quiví. Ta java na cáchí n̄a ña in cúu tóco ndihi quiví. Ta ndítahan nuú in in na caxi na ña cáhvi ini na sahá ña yóho. ⁶ Tá sácú ini na caxi na in quiví caja cáhnu na Ndióxi ta v̄aha va cája na. Ta tá cáhán n̄a cuu caja cáhnu na Ndióxi ndá quiví nacuu va ta v̄aha ri já va. Ta vatí x̄ixi na cuñu, ña sa najoco na nuú yoco á cō x̄ixi toho na ña joo

ndíquiáhva na ndixahvi nu Ndióxi sahá ta xihín ña yóho cája cáhnu na mé á.

⁷ Ni in yó co tácu saha mí ta ni in yó co xihí saha mí. ⁸ Ta tá tácu yo á tá naxihí yo mé a ndaa cúu yó na cómi Ndióxi cuénta saha ta cúu mé á xitoho í. ⁹ Sahá ña cán quéa naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

¹⁰ Ña cán quéa a váha toho cája ndó tá sándehe ndaa ndó ñani táhan ndó. A váha caja ndó candají ndó na jáchi vaxi quiví ndique táhan ndihí candita í nu Ndióxi ña caja vií a saha yo. ¹¹ Jáchi já cáchi tuhun Ndióxi já:

Yóho ín i cáchi i xihín ndo ña xinu quiví ndica xítí tóco ndihi ñayivi nuú i,
ta casáhá na caja cáhnu na yehe, ña cúu Ndióxi,
cáchi Ndióxi, xitoho í.

¹² Jáchi nditahan nuú in in í ndiquiahva í cuénta sahá ña nacaja í nu Ndióxi.

A cája ndó ñaha ña cuu jándicava ñayivi nuú cuachi

¹³ Sahá ña cán quéa co ndítahan candehé ndaa táhan í. A cácu ini ndó caja ndó ñaha, ña cuu jándacava na cúu cuénta Jesús nuú cuachi ta já ná jándacoo na ña cándeé ini na Ndióxi. ¹⁴ Sahá ña cándeé ini i Jesús, xitoho i sahá ña cán quéa cándaá vaha ini i ña co cája i cuachi tá xíxi i ña najoco na nuú yoco. Joo tá ndúu na cáhán ña a váha toho cuxu na ña já quéa co ndítahan cuxu na ña jáchi cuu candojo na cuachi sahá tá ná cuxu na ña. ¹⁵ Joo tá ndihíhvi ñanún, na cúu cuénta Jesús sahá ñaha xísún já quéa cúní cachi a ña cándajún na. Cuénta

coún ná a cájún ña ndicava na cán nuú cuachi sahá ña xísún jáchi cúú ná na naxihi Jesucristo saha. ¹⁶ Vatí cándaá ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó. ¹⁷ Jáchi a juú sahá ña xíxi ni sahá ña xíhí cacomí Ndióxi cuéntá saha yo. Ña cúní Ndióxi caja í queá ná canduu ndaa yo nu mé á ta ná coo vaha ini xihín ñayivi ta ná cajji ini. Tóco ndihi ña yóho cúú á ña quixi nu ínimá yíi Ndióxi. ¹⁸ Tá ná caja ndó ña yóho já queá caja cáhnu ndó Jesucristo ta cajji ini Ndióxi caja ndó ta candoo vaha ndó nuú ñayivi.

¹⁹ Ña cán queá xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi. ²⁰ Nasacu ini Ndióxi jácau a ñayivi sahá ña cán queá coto a cájí nuu ndó nuú ña cúní Ndióxi caja sahá ñaha xíxi ndó. Mé a ndaa tóco ndihi ñaha cúú á ña vaha cuxú. Ña co váha queá jándacava í ñayivi nuú cuachi sahá ña xíxi. ²¹ Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi. ²² Tá ta cándaá cáxí ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchi tahví nacuu ñayivi tá xíní na co cája na cuachi nu Ndióxi. ²³ Joo ndá na ndúcú cuxu in ñaha ta cáhvi ivi joho ini na xihín á tá xíxi na ña já queá xínu cuachi jata ná. Jáchi ndá ñaha nacuu ná caja í ta tá ta cándúsa yó ña cúú á cuachi já queá xínu a cacuu a cuachi nu yo.

Chindeé ndó na cáhvi ivi joho ini

¹ Tá ndacú cuahān yó xihín tuhun Ndióxi já quéa co ndítahan cacu xóo í na vitá xihín tuhun Ndióxi. A ndúcú ndo caja ndó ña jándivaha ini mé cuití va ndó. ² Tóco ndihí xíní ñúhú caja í ñaha ña táhán ini ñani táhan í xihin. Ta xíní ñúhú caja í ña já ná chindeé yó na ña ná canduu vaha na ta já ná cuu cuahnu chága na xihín tuhun Ndióxi. ³ Jáchí mé Jesucristo coo nanducú a caja ña táhan ini mé cuití a. Ña nacaja mé á quéa najáxinu coo a nuú tuhun Ndióxi tá nacachi a já: “Tuhun núu ña najácana na nu mé ndó naxinu ri a jatá yehe viti.” ⁴ Tóco ndihi ña nacahyi nuú tuhun Ndióxi sanahá nacahyi a já ná jánahā nu yo ña co ndítahan ndicani iní. Ta, náha ña ndítahan quiahva tuhun ndeé iní nani ndátí jáxinu Ndióxi tuhun nasahan nu yo. ⁵ Ndióxi quéa sáhan ndeé nu yo ña ná coo cáhnu iní ta sa mé á sáhan tuhun ndeé iní. Ña cúni Ndióxi quéa chindeé a ndohó caja ndó tá quiahva nacaja Jesucristo ta já in ná nduu xihin táhan ndó. ⁶ Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

Xini joho na coo naquixi chichi Israel tuhun vaha saha Jesús

⁷ Ndiquehe vaha ndó tóco ndihi na cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi. ⁸ Ndítahan ndicuhun ini ndó ña naquixi Jesucristo chindeé a ñayivi Israel. Ta naquixi a jánahā nu ná ña mé a ndaa táhyí jáxinu coo Ndióxi tóco ndihi nuú tuhun ña nasahan nuú tásáhnu jícó yo jáchí co ndímaní Ndióxi nuú tuhun a. ⁹ Ta naquixi a jácacu a ñayivi,

na coo naquixi chichi Israel ña ná caja cáhnu na mé á sahá ñamani nacaja mé á xihín ná. Jáchí já cáhí tuhun Ndióxi:

Yehe xihín na coo naquixi chichi Israel caja cáhnu nde ndohó, Ndióxi,

ta yehe cata i nu ndo caja cáhnu i quivi ndo.

¹⁰ Ta íin inga tucu nu cáhí a já:

Ndohó, na coo naquixi chichi Israel xíní ñúhú ndique táhan ndó cajji ini ndó xihín na naquixi chichi Israel.

¹¹ Anda já nacachi tucu a já:

Tóco ndihi ndó, na coo naquixi chichi Israel caja cáhnu ndó Ndióxi, xitoho í,

ta ná a jándacoo toho ndihi ñayivi caja cáhnu na Ndióxi.

¹² Tá nacahyí Isaías nuú tuhun Ndióxi já nacahyí da tuhun yóho:

Vaxi quivi cacu in da chichi Isai,

ña ná cacomí da cuénta sahá ñayivi, na coo naquixi chichi Israel.

Ta mé ñayivi yóho candeé ini na mé da quixi chichi Isai cán.

¹³ Ndióxi quéa cája ña ná candeé ini ndó mé á ta já cuu jácacu a ndohó. Ná caja mé á ña ná ndicutú ini ndó xihín ña cajji ini ndó ta ná caja mé á ña ná coo vaha ini ndó jáchi candeé ini ndó a. Xihín ndée ínimá yji Ndióxi ná quiahva mé á cuaha ndée nu ndó candeé chága ini ndó a.

¹⁴ Cándehé ndó ñani i, na cúu cuénta Jesús. Sa xíní vaha i ña nachutú ndo xihín ña vaha ta cánda vaha ini ndó tuhun Ndióxi. Ta xihín ña jan cuu jánahá táhan ndó. ¹⁵ Joo tá nacahyí i carta yóho nu ndo já nacaja ndeé ini i cáhyi i saha java ñaha

jáchí cō cúní ña ná ndindójó ndo ña. Cáhyí ña yóho jáchí ñacaja Ndióxi ñamaní xihín ña ¹⁶ cája chúun ña cuéntá Jesucristo cáxi tuhun ña tuhun vaha saha mé á nuú ñayivi, ña cōo ñaquixi chichi Israel. Ta cúu ña tátuhun jutú jáchí xíca ña cáhan ña tuhun Ndióxi xihín ná já ná cuu cacu ndaa ínimá ná. Cúu á tátuhun jócō ña ña nu Ndióxi já ná cajii ini mé á xihín ná ta já ná cuu ndaja ínimá yii mé á ña ná nduu na ñayivi vii nu mé á.

¹⁷ Ta sahá ña cándúsa ña Jesucristo sahá ña cán quéa ndivaha ini ña caja chúun ña cuéntá Ndióxi.

¹⁸ Jáchí sahan ndeé ini ña cáhan ña sahá ña ñacaja Jesucristo tá ñacaja chúun mé á yehe ña candaca ña ña cōo ñaquixi chichi Israel ña ná caja na ña cúní Ndióxi. Ta sahá ña ñacahan ña xihín ña cán já ñaxini jóho na ta ñacaja na ña cáchí tuhun Ndióxi. ¹⁹ Ta sa ñaxini na ña xitúhún xihín ña náhnu ndivaha ñacaja ña nu ná xihín ndeé ínimá yii Ndióxi. Ta quiahva já ñacaxi tuhun ña tuhun vaha saha Jesucristo nuú ñayivi ndúu ñuu Jerusalén xihín nu tóco ndihi ña ndúu ndijáá ñuu anda estado Ilírico.

²⁰ ña ndúcú ña caja ña quéa cahan ña xihín ña ñayivi ña cúní Ndióxi jácacu a ña. Ta sá cahan ña ña yóho nuú ñayivi, ña a ñaha cuni jóho saha Jesucristo jáchí cō cúní ndíquehe e chuun ña sa najácava sahá inga na.

²¹ Cáhvi ini ña vaha chága ná cuhun ña nuú ñayivi, ña cōo ñaxini jóho tuhun vaha saha Jesús jáchí já cáchí tuhun Ndióxi já:

Vatí cōo ñaxini jóho na tuhun vaha saha mé á joo vaxi quivi xinu cōo na cahan xihín ná,
 ña ná cándaá ini na ña cōo ñacandaá ini na jihna,
 cáchí tuhun Ndióxi.

Sácú ini Pablo cuhun da ñuu Roma

²² Ta sahá chuun cája i yóho coó nacuu saa i coto nihni i ndohó vatí sa cuahá tañu nasacu ini i saa i jan. ²³ Joo viti sa najándihi i chuun nacaja i tañu ñayivi ndúu yóho. Ta sa cáhvi ini i saa i coto nihni i ndohó anda sanahá. ²⁴ Sahá ña cán quéa sácú ini i saa i coto nihni i ndohó tá ná yaha i cuhun i chí España. Ta tá ná ndihi cajii ini i cuni i ndohó anda jáví ndiquehe tucu u íchi cuhun i. Joo cúni ña ná chindeé ndó yehe já ná cuu ndiquehe tucu u íchi cuhun i. ²⁵ Joo viti cuhun i chí ñuu Jerusalén chindeé na cúu cuéntá Jesús ndúu cán. ²⁶ Jáchi na cúu cuéntá Jesús ndúu estado Macedonia xihín na ndúu estado Acaya nasacu ini na játaca na jjuhún ta chindahá na ña nuú na cúu cuéntá Jesús, na cándáhví ndúu ñuu Jerusalén. ²⁷ Mé na tóho yóho nasacu ini na caja na ña ta vaha cája na jáchi cáhán na ña ndítahan nu ná चाहvi na sahá ña nacaja na Israel, mé na cúu cuéntá Jesús ndúu ñuu Jerusalén xihín ná. Jáchi nasahan na Israel nacaxi tuhun na tuhun vaha saha Jesús nu ná. Ta viti ndúcú ñehe na tóho yóho ñamaní nacaja na Israel xihín ná. Ña cán quéa chindeé ñahá na toho xihín ña cómi na. ²⁸ Ta tá sa najándihi i caja i chuun yóho ta tá sa nandihí ndiquiahva i jjuhún nataca na tóho nuú na cúu cuéntá Jesús ndúu ñuu Jerusalén anda já nuná nuú i cuhun i España ta já yaha i jan coto nihni i ndohó. ²⁹ Ta xíni vaha i ña tá ná saa i jan caja Jesucristo cuahá ñamaní xihín ndo sahá tuhun vaha cahan i xihín ndo.

³⁰ Xíca tahví i nu ndo ñani mí i, na cúu cuéntá Jesús, ña in nuú ná cacá tahví yo nu Ndióxi sahá chuun cája i. Jáchi cándeé ini ndó Jesucristo ta

quíhvi ini ndo yehe nacaja ínimā yii Ndióxi. ³¹ Caca tahví ndo nu á ña ná chindeé a yehe ná a cája ñayivi, na co cándúsa Ndióxi ndúu estado Judea ni in ñaha xihín i. Ta cacā tahví ndo nu Ndióxi ña ná candúsa na cúu cuéntá Jesús ndúu ñuu Jerusalén cán ndiquehe vaha na jiuhún ñéhe cuahan i nu ná. ³² Já quéa tá ná cúni Ndióxi já cajii ini i saa i coto nihni i ndohó ta ndiquehe ndeé e nani xito nihni i ndohó. ³³ Ndióxi ná coo xihin ndo ta ná caja mé á ña ná coo vaha ini ndó. Já ná coo.

16

Chíndahá Pablo Ndióxi coo na ndúu ñuu Roma

¹ Já chá va casaā ñá nani Febe, ñá cúu cuéntá Jesús nu ndo. Mé Febe yóho nacaja chúun ñá veñuhu Cencrea. ² Caja ndó ñamaní ndiquehe vaha ndó ña sahá ña cúu ñá cuéntá Jesús, xitoho í ta já ndítahan caja na cándeé ini Jesús. Chindeé ndó ñá yóho xihín ndihi ñaha ña cámani nu ña jáchi nachindeé ña cuahá ndivaha ñayivi ta nachindeé ri ñá yehe va.

³ Chíndahá i Ndióxi coo Priscila xihin Aquila jáchi in cúu ná xihín i cája chúun na cuéntá Jesucristo. ⁴ Mé na yóho nasahin tiahva na quivi na já ná cuu cacu yehe tá naquixi tondóhó nuú i. Ta a juú in túhún yehe ndíquiahva ndixahvi nu ná vaha. Tóco ndihi na cúu cuéntá Jesús, na coo naquixi chichi Israel ndíquiahva na ndixahvi nu ná. ⁵ Ta jári chíndahá i Ndióxi coo na cúu cuéntá Jesús, na ndíque táhan vehe Priscila xihin Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá nasacuu da nu cuítí nandihvi íchi cuéntá

Jesús estado Acaya. ⁶ Ta caḥan Ndióxi ndó xihin María, ñá chindeé cuahá ndohó. ⁷ Ta chindahá i Ndióxi coo Andrónico xihín Junias. Ndívi da yóho cúú dá da naquixi chichi nuú naquixi mí i. Ta in nasañuhu nde vecaa xihin dá. Ta cúú dá da náhnu tañu na apóstol. Ta jihna ñúhú ndívi mé da yóho naçasahá cándúsa da Jesucristo a juú ga yehe.

⁸ Ta caḥan Ndióxi ndó xihin Amplias jáchi quíhvi ndivaha ini i da. Ta in cúú nde cuéntá Jesús. ⁹ Ta chindahá i Ndióxi coo Urbano. In cúú mé dá xihín nde cája chúun da xihín nde cuéntá Jesucristo. Ta chindahá i Ndióxi coo Estaquis, da quíhvi ndivaha ini i. ¹⁰ Ta chindahá i Ndióxi coo Apeles jáchi cuahá tañu najánaha da nuú ñayivi ña mé a ndaa táhyí cándéé cáhnu ini da Jesucristo. Ta quiahva já chindahá i Ndióxi coo na vehe Aristóbulo. ¹¹ Ta caḥan Ndióxi ndó xihin Herodión jáchi in naquixi nde chichi Israel. Ta caḥan Ndióxi ndó xihín na vehe Narciso jáchi cándúsa na Jesús, xitoho í. ¹² Ta caḥan Ndióxi ndó xihin Trifena ta xihin Trifosa, na cája chúun cuéntá Jesucristo, xitoho í. Ta caḥan Ndióxi ndó xihin Pérsida, jáchi quíhvi ndivaha ini i ña ta cuahá ndivaha naçaja chúun ña cuéntá Jesucristo, xitoho í. ¹³ Ta caḥan Ndióxi ndó xihin Rufo jáchi cúú dá da cáhnu ndivaha tañu na cúú cuéntá Jesús. Ta caḥan Ndióxi ndó xihin náná da jáchi cúú ña tátuhun náná mí i viti. ¹⁴ Ta chindahá i Ndióxi coo Asíncrito xihin Flegonte xihín Hermas xihin Patrobas xihin Hermes. Ta chindahá i Ndióxi coo tóco ndihi na cúú cuéntá Jesús ndúu xihín na cán. ¹⁵ Ta caḥan Ndióxi ndó xihin Filólogo xihin Julia xihin Nereo ta xihín quiahva da. Ta caḥan Ndióxi ndó xihin Olimpás ta xihin tóco ndihi na

cúu cuéntá Jesús ndúu xihín na cán.

16 Ña cúní queá ná caḥan Ndióxi xihín táhan ndó ta ná tatí yúhu táhan ndó ta yíi caja ndó ña. Tóco ndihi na cúu cuéntá Jesús, na táca veñuhu yóho chindahá na Ndióxi coo ndihi ndó.

17 Cándehé ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihín na cátóo ndicahnda ñayivi, na cúu cuéntá Jesús jáchi sáji nuu na nuu na cája ña cúní Ndióxi. Ña cája na jan queá cáxoo na nuú ña najánaha nde nu ndo. Coto a cátaḥan ndó xihín ná. 18 Jáchi mé na yóho co cúu ná na cája chúun cuéntá Jesucristo, xitoho í. Ña cája na queá ndúcú na ña vaha mé cuití va na. Ta xihín tuhun ñúchí ta xihín tuhun vii jándahvi na ñayivi, na co tácu vaha ini. 19 Tóco ndihi ñayivi xíni na ña cája ndó ña cúní Ndióxi ña cán queá cáji ndivaha ini i. Ña cúní queá ná nahá ndó ña ndíchí jini ndo xihín ña vaha cája ndó. Ta a cañuhu ini ndó caja ndó ña núu. 20 Yachi chá jándihi Ndióxi sahá Satanás, rí cúu tiñáhá sacuaḥa ta já cuu cañu ndó ri xihín ndéé Ndióxi. Cacuu a tátuhun chiníhni saḥa ndó ri. Ná caja Ndióxi ña ná coo vaha ini ndó. Ta ná caja cuaḥá Jesucristo, xitoho í ñamaní xihín ndihi ndo.

21 Chindahá Timoteo Ndióxi coo ndó ta in cúu dá cája chúun da xihín i. Ta chindahá ri Lucio xihín Jasón xihín Sosípater Ndióxi coo ndó. Tóco ndihi da yóho naquixi da chíchi Israel nuú naquixi mí i.

22 Yehe naní Tercio ta cáhyí i carta yóho ta chindahá ri yehe va Ndióxi coo ndó cuéntá Jesucristo, xitoho í.

²³ Chíndahá Gayo Ndióxi coo ndó. Vehe mé dá ín i ta sa mé yóho táca na cúu cuéntá Jesús. Ta chíndahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chíndahá ri Cuarto, da cúu cuéntá Jesús Ndióxi coo ndó.

²⁴ Ná caja cuahá Jesucristo, xitoho í ñamaní xihín ndihi ndó. Já ná coo.

Cája cáhnu Pablo Ndióxi

²⁵ Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saha Jesús ña jánaha nde nu ndo. Anda sanahá tá cámani cava sahá saha ñuyíví nasacu ini Ndióxi jácacu a ndohó ta viti naxinu quiví jánaha mé á ña nu ndo. Nahá ndivaha nasahin jehé tuhun vaha saha Jesús.

²⁶ Ta viti cándaá iní ña naçahan Ndióxi saha Jesús nuú na profeta ta na yóho naçahyí na ña nuú tutu. Ta nasahnda Ndióxi chuun nuú na cúu cuéntá mé á ña ná cahun na caxi tuhun na ña nu tóco ndihi ñayivi ndúu ñuyíví. Ta xihín mé ña yóho naçaja Ndióxi ña ná cuu candeé ini ñayivi mé á ta já ná caja na ña cúní a, mé a tácu anda ama cáa quiví.

²⁷ Ta mé cuití va cúu Ndióxi ta mé cuití va ndíchí jini sahá ña cán queá ndítahan caja cáhnu yó a anda ama cáa quiví sahá ña naçaja Jesucristo, xitoho í. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f